

御定全唐詩錄

土岐文庫  
文庫17  
W65  
7



三  
寺  
藏  
書  
一  
二  
三  
四  
五  
六  
七  
八  
九  
十  
十一  
十二  
十三  
十四  
十五  
十六  
十七  
十八  
十九  
二十

三

三

010185189231

文庫 17  
W 65  
7

昭和六十年二月一日  
土岐善唐氏寄贈

御定全唐詩錄卷第十八

禮部侍郎臣徐倬翰林院侍讀學士臣徐元正奉

旨校刊

元結

結字次山襄州人少不羈年十七折節向學事元  
德秀天寶十二載舉進士禮部侍郎陽浚見其文  
曰一第恩子耳有司得子是賴果擢上第後舉制  
科國子司業蘇源明薦結於肅宗上時議三篇帝  
悅擢右金吾兵曹參軍攝監察御史為山南西道  
節度參謀以討賊功遷監察御史裏行進水部郎  
佐荆南節度使呂諲又叅山南東道來瑱府瑱誅



攝領府事代宗立固辭丐侍親樊上授著作郎拜  
道州刺史流亡歸者萬餘進容管經略使民樂其  
教立石頌德嘗著元子十篇故以元子為稱兵亂  
入猗玗洞稱猗玗子後家襄濱稱浪士及有官人  
以為浪者亦漫為官乎呼為漫郎樊上漁者相戲  
更為聲叟又稱漫叟所著有文編李商隱為之序  
歸來子云結性耿介有憂道憫俗之意天寶之亂  
或仕或隱自謂與世聲牙故其見於文字者亦冲  
澹而隱約譬古鐘磬不諧於里耳而詞義微妙翫  
之翛然若有塵外之趣

古體詩

補樂歌

網罟 網罟伏羲氏之樂歌也其義蓋稱伏羲  
能易人取禽獸之勞凡二章章四句

吾人苦兮水深深網罟設兮水不深

吾人苦兮山幽幽網罟設兮山不幽

鍾惺云老莊著書  
深旨尋常拈出

系樂府

并序

天寶辛未中元子將前世嘗可稱歎者為詩十

二篇錄八為引其義名之總命曰系樂府古人詠

歌不盡其情聲者化金石以盡之其歡怨甚耶

戲音呼盡歡怨之聲者可以上感於上下化於下

故元子系之

元結

思太古

東南三千里沅湘爲太湖湖上山谷深有人多似愚嬰  
孩寄樹顛就水捕鱖反於鄱鱸所歡同鳥獸身意復何拘吾  
行遍九州此風皆已無吁嗟聖賢教不覺久踟躕

賤士吟

南風發天和和氣天下流能使萬物榮不能變羈愁爲  
愁亦何爾自請說此由諂競實多路苟邪皆共求嘗聞  
古君子指以爲深羞正方終莫可江海有滄洲

欸乃曲

誰能聽欸乃欸乃感人情不恨湘波深不怨湘水清所  
嗟豈敢道空羨江月明昔聞扣斷舟引釣歌此聲始歌

悲風起歌竟愁雲生遺曲今何在逸爲漁父行

貧婦詞

誰知苦貧夫家有愁怨妻請君聽其詞能不爲酸悽所  
憐抱中兒不如山下麀空念庭前地化爲人吏蹊出門  
望山澤回頭心復迷何時見府主長跪向之啼

去鄉悲

踟躕古塞關悲歌爲誰長日行見孤老羸弱相提將聞  
其呼怨聲聞聲問其方乃言無患苦豈棄父母鄉非不  
見其心仁惠誠所望念之何可說獨立爲悽傷

壽翁興

借問多壽翁何方自修育惟云順所然忘情學草木始

知世上術勞苦化金玉不見充所求空聞恣耽欲清和  
存王母潛獲無亂黷誰正好長生此言堪佩服

農臣怨

農臣何所怨乃欲干人主不識天地心徒然怨風雨將  
論草木患欲說昆蟲苦巡迴宮闕傍其意無由吐一朝  
哭都市淚盡歸田畝謠頌若採之此言當可取

下客謠

下客無黃金豈思主人憐客言勝黃金主人然不然珠  
玉成彩翠綺羅如嬋娟終恐見斯好有時去君前豈知  
保忠信長使令德全風聲與時茂歌頌萬千年

與灤溪鄰里

有序

乾元元年元子將家自全於灤溪上元二年領  
荆南之兵鎮於九江方在軍旅與灤溪鄰里不  
得如往時相見遊又知灤溪之人日轉窮困故  
作詩與之

昔年苦逆亂舉族來南奔日行幾十里愛君此山村峯  
谷呀回映誰家無泉源脩竹多夾路扁舟皆到門灤溪  
中曲濱其陽有閑園鄰里昔贈我許之及子孫我嘗有  
匱乏鄰里能相分我嘗有不安鄰里能相存斯人轉貧  
弱力役非無冤終以灤濱訟無令天下論

喻灤溪鄉舊遊

往年在灤濱灤人皆忘情今來游灤鄉灤人見我驚我

心與讓入豈有辱與榮讓入異其心應爲我冠纓昔賢  
惡如此所以辭公卿貧窮老鄉里自休還力耕況曾經  
逆亂日厭聞戰爭尤愛一溪水而能存讓名終當來其  
濱飲啄全此生

忝官引

天下昔無事僻居養愚鈍山野性所安熙然自全順忽  
逢暴兵起閭巷見軍陣將家瀛海濱自棄同芻糞往在  
乾元初聖人啓休運公車詣魏闕天子垂清問敢誦王  
者箴亦獻當時論朝廷愛方直明主嘉忠信屢授不次  
官曾與專征印兵家未曾學榮利非所徇偶得兇醜降  
功勞愧分寸爾來將四歲慙恥言可盡請取寃者辭爲

吾忝官引寃辭何者苦萬邑餘灰燼寃辭何者悲生人  
盡鋒刃寃辭何者甚力役遇勞困寃辭何者深孤弱亦  
哀恨無謀救寃者祿位安可近而可愛軒裳其心又干  
進此言非作戒此言敢貽訓實欲辭無能歸耕守吾分

樊上漫作

漫家郎亭下復在樊水邊去郭五六里扁舟到門前山  
竹遶茅舍庭中有寒泉西邊雙石峯引望堪忘年四鄰  
皆漁父近渚多閑田且欲學耕釣於斯求老焉

酬孟武昌苦雪

積雪閉山路有人到庭前云是孟武昌令獻苦雪篇長  
吟未及終不覺爲悽然古之賢達者與世竟何異不能

救時患諷諭以全意知公惜春物豈非愛時和知公苦  
陰雪傷彼災患多姦兇正驅馳不合問君子林鶯與野  
獸無乃怨於此兵興向九歲稼穡誰能憂何時不發卒  
何日不殺牛耕者日已少耕牛日已稀皇天復何忍更  
又恐斃之自經危亂來觸物堪傷歎見君問我意只益  
曾中亂山禽飢不飛山木凍皆折懸泉化爲冰寒水近  
不熱出門望天地天地皆昏昏時見雙峰下雪中生白  
雲

喻舊部曲

漫遊樊水陰忽見舊部曲尚言軍中好猶望有所屬故  
令爭者心至死終不足與之一杯酒喻使燒戎服兵興

向十年所見堪歎哭相逢是遣人當合識榮辱勸汝學  
全生隨我畚退谷

雪中懷孟武昌

冬來三度雪農者歡歲稔我麥根已濡各得在倉廩天  
寒未能起孺子驚人寢云有山客來籃中見冬蕈燒柴  
爲溫酒煮鰕爲作瀋客亦愛杯樽思君共杯飲所嗟山  
路閑時節寒又甚不能苦相邀興盡還就枕

招孟武昌

并序

漫叟作退谷銘指曰干進之客不得遊之作杯  
湖銘指曰爲人厭者勿泛杯湖孟士源嘗黜官  
無情干進在武昌不爲人厭可遊退谷可泛杯



湖故作詩招之

風霜枯萬物退谷如春時窮冬涸江海杯湖澄清漪湖  
盡到谷口單船近堦墀湖中更何好坐見大江水欹石  
為水涯半山在湖裏谷口更何好絕壑流寒泉松桂蔭  
茅舍白雲生坐邊武昌不干進武昌人不厭退谷正可  
遊杯湖任來泛湖上有水鳥見人不飛鳴谷中有山獸  
往往隨人行莫將車馬來令我鳥獸驚

登殊亭作

時節方大暑試來登殊亭憑軒未及息忽若秋氣生主  
人既多閑有酒共我傾坐中不相異豈限醉與醒漫歌  
無人聽浪語無人驚時復一回望心目出四溟誰能守

纓佩日與災患并請君誦此意令彼惑者聽

漫酬賈沔州

有序

賈德方與漫叟者懼漫叟不能甘窮獨懼漫叟  
又須為官故作詩相喻其指曰勸爾莫作官作  
官不益身因德方之意遂漫酬之

往年壯心在嘗欲濟時難奉詔舉州兵令得誅暴叛上  
將屢顛覆偏師常救亂未曾弛戈甲終日領簿案出入  
四五年憂勞忘昏旦無謀靜兇醜自覺愚且悞豈欲阜  
櫪中爭食麩與蕡麩糠中可食者下沒反牛  
馬食餘草節曰蕡下諫反去年辭職事所懼  
貽憂患天子許安親官又得閒散自家焚水上性情尤  
荒慢雲山與水木似不憎吾漫以茲忘時世日益無畏

憚漫醉人不嗔漫眠人不喚漫遊無遠近漫樂無早晏  
漫中漫亦忘名利誰能算聞君勸我意爲君一長歎人  
誰年八十我已過其半家中孤弱子長子未及冠且爲  
兒童主種藥老溪澗

春陵行 有序

癸卯歲漫叟授道州刺史道州舊四萬餘戶經  
賊已來不滿四千大半不勝賦稅到官未五十  
日承諸使徵求符牒二百餘封皆曰失其限者  
罪至貶削於戲若悉應其命則州縣破亂刺史  
欲焉逃罪若不應命又即獲罪戾必不免也吾  
將守官靜以安人待罪而已此州是春陵故地

故作春陵行以達下情

軍國多所須切責在有司有司臨郡縣刑法競欲施供  
給豈不憂徵斂又可悲州小經亂後遺人實困疲大鄉  
無十家大族命單羸朝食是草根暮食是木皮出言氣  
欲絕意速行步遲追呼尚不忍況乃鞭朴之郵亭傳急  
符往來跡相追更無寬大恩但有迫促期欲令鬻兒女  
言發恐亂隨悉使索其家而又無生資聽彼道路言怨  
傷誰復知去冬山賊來殺奪幾無遺所願見王官撫養  
以惠慈奈何重驅逐不使存活爲安人天子命符節我  
所持州縣忽亂荒得罪復是誰逋緩違詔令蒙責固所  
宜前賢重守分惡以禍福移亦云貴守官不愛能適時

顧惟孱弱者正直當不虧何人采國風吾欲獻此辭

賊退示官吏

有序

癸卯歲西原賊入道州焚燒殺掠幾盡而去明年賊又攻永州破邵不犯此州邊鄙而退豈力能制敵歟蓋蒙其傷憐而已諸使何爲忍苦徵斂故作詩一篇以示官吏

昔歲逢太平山林二十年泉源在庭戶洞壑當門前稅有常期日晏猶得眠忽然遭世變數歲親戎旃今來典斯郡山夷又紛然城小賊不屠人貧傷可憐是以陷鄰境此州獨見全使臣將王命豈不如賊焉今彼徵斂者迫之如火煎誰能絕人命以作時世賢思欲委符節

引竿自刺船將家就魚麥歸老江海邊

遊惠泉示泉上學者

顧吾漫浪久不欲有所拘每到惠泉上情性可安舒草堂在山曲澄瀾涵堦除松竹蔭幽徑清源湧坐隅築塘列圃畦引流灌時蔬復在郊郭外正堪靜者居愜心則自適喜尚人或殊此中若可安不佩銅虎符

石魚湖上作

有序

惠泉南上有獨石在水中狀如遊魚魚凹處修之可以<sub>反</sub>照<sub>魚</sub>酒水涯四匝多欹石相連石上堪人坐水能浮小舫載酒又能繞石魚洄流乃命湖曰石魚湖鐫銘於湖上顯示來者又作詩以

歌之

吾愛石魚湖石魚在湖裏魚背有酒樽繞魚是湖水兒  
童作小舫載酒勝一杯座中令酒舫空去復滿來湖岸  
多欹石石下流寒泉醉中一盃漱快意無比焉金玉吾  
不須軒冕吾不愛且欲坐湖畔石魚長相對

宴湖上亭作

廣亭蓋小湖湖亭實清曠軒窓幽水石怪異尤難狀石  
樽能寒酒寒水宜初漲岸曲坐客稀杯浮上搖漾遠風  
入簾幕浙瀝吹酒舫欲去未回時飄飄正堪望酣興思  
共醉促酒更相向舫去若驚鳧溶瀾滿湖浪朝來暮忘  
返暮歸獨惆悵誰肯愛林泉從吾老湖上

引東泉作

東泉人未知在我左山東引之傍山來垂流落庭中宿  
霧含朝光掩映如殘虹有時散成雨飄灑隨清風衆源  
發淵竇殊怪皆不同此流又高懸瀦瀦乎東反在長空山林  
何處無茲地不可逢吾欲解纓佩便爲泉上翁

登白雲亭

出門上南山喜逐松逕行窮高欲極遠始到白雲亭長  
山繞井邑登望宜新晴洲渚曲湘水縈迴隨郡城九疑  
千萬峯嶮嶮天外青煙雲無遠近皆傍林嶺生俯視松  
竹間石水何幽清涵映滿軒戶娟娟如鏡明何人病懣  
濃積醉且未醒與我一登臨爲君安性情

惠陽亭作

有序

初得惠泉則爲亭於泉上因開簷雷又得石渠  
泉渠相宜亭更加好以亭在泉北故命之曰惠

陽亭

問吾常讌息泉上何處好獨有惠陽亭令人可終老前  
軒臨惠泉憑几漱清流外物自相擾淵淵還復休有時  
出東戶更欲簷下坐非我意不行石渠能留我峰石若  
鱗次欹垂復旋迴爲我引惠泉冷冷簷下來天寒宜泉  
溫泉寒宜大暑誰到惠陽亭其心肯思去

夜讌石魚湖作

風霜雖慘然出遊熙天正

平聲

登臨日暮歸置酒湖上亭

高燭照泉深光華溢軒楹如見海底日曛曛始欲生夜  
寒閉窓戶石溜何清泠若在溪洞中半崖聞水聲醉人  
疑舫影呼指遙相驚何故有雙魚隨吾酒舫行醉昏能  
誕語勸醉莫忘情坐無拘忌人勿限醉與醒

招陶別駕家陽華作

海內馱兵革騷騷十二年陽華洞中人似不知亂焉誰  
能家此地終老可自全草堂背巖洞幾峰軒戶前清渠  
匝庭堂出門仍灌田半崖盤石徑高亭臨極顛引望見  
何處逶迤隴北川杉松幾萬株蒼蒼滿前山巖高暖華  
陽飛溜何潺潺洞深迷遠近但覺多回淵晝遊興未盡  
日暮不欲眠援燭飲洞中醉昏漱寒泉始知天下心耽

愛各有偏陶家世高逸公忍不獨然無或畢婚嫁竟爲俗務牽

劉侍御月夜讌會 有序

兵興已來十一年矣獲與同志歡醉達旦詠歌  
取適無一二焉乙巳歲彭城劉靈源在衡陽逢  
故人或有在者日昔相會第歡遠遊始與諸公  
待月而笑語竟與諸公愛月而歡醉詠歌夜久  
賦詩言懷於戲文章道喪蓋久矣時之作者煩  
雜過多歌兒舞女且相喜愛系之風雅誰道是  
耶諸公嘗欲變俗之淫靡爲後生之規範今夕  
豈不能道達情性成一時之美乎

我從蒼梧來將耕舊山田踟躕爲故人且復停歸船日  
夕得相從轉覺和樂全愚愛涼風來明月正滿天河漢  
望不見幾星猶粲然中夜興欲酣改坐臨清川未醉恐  
天旦更欲促繁絃歡娛不可逢請君莫言旋

別孟校書 有序

平昌孟雲卿與元次山同州里以辭學相友幾  
二十年次山今罷守春陵雲卿始典校芸閣於  
戲材業次山不如雲卿辭賦次山不如雲卿通  
和次山不如雲卿在次山又詡然求進者也誰  
言時命吾欲聽之次山今且未老雲卿少次山  
六七歲雲卿聲名滿天下知已在朝廷及次山

之年雲卿何事不可至勿隨長風乘興蹈海勿  
愛羅浮往而不歸南海幕府有樂安任鴻與次  
山最舊請任公爲次山一白府主趣資裝雲卿  
使北歸慎勿令徘徊海上諸公第作歌送之  
吾聞近南海乃是魑魅鄉忽見孟夫子歡然遊此方忽  
喜海風來海帆又欲張漂漂隨所去不念歸路長君有  
失母兒愛之似阿陽始解隨人行不欲離君傍相勸早  
旋歸此言慎勿忘

別何負外

誰能守清躅誰能嗣世儒吾見何君饒爲人有是夫黜  
官二十年未曾暫崎嶇終不病貧賤寥寥無所拘忽然

逢知己數月領官符猶是尚書郎收賦來江湖人皆悉  
蒼生隨意極所須比盜無兵甲似偷又不如公能獨寬  
大使之力自輸吾欲援時謠爲公伏奏書但恐抵忌諱  
未知肯聽無不然且相送醉歡於坐隅

宓樽詩

在道州

嶢嶢小山石數峰對宓亭宓石堪爲樽狀類不可名巡  
回數尺間如見小蓬瀛樽中酒初漲始有島嶼生豈無  
日觀峯直下臨滄溟愛之不覺醉醉卧還自醒醒醉在  
樽畔始爲吾性情若以形勝論坐隅臨郡城平湖近堦  
砌遠山復青青異木幾十株枝條冒簷楹盤根滿石上  
皆作龍蛇形酒堂貯釀器戶牖皆罌餅此樽可常滿誰

是陶淵明

登九疑第二峯

九疑第二峯其上有仙壇杉松映飛泉蒼蒼在雲端何人居此處云是魯女冠不知幾百歲讌坐餌金丹相傳羽化時雲鶴滿峰巒婦中有高人相望空長歎

宿洄溪翁宅

長松萬枝遶茅舍怪石寒泉近簷下老翁八十猶能行將領兒孫行拾稼吾羨老翁居處幽吾愛老翁無所求時俗是非何足道得似老翁吾即休

石魚湖上醉歌

有序

漫叟以公田米釀酒因休暇則載酒於湖上時

取一醉歡醉中據湖岸引臂向魚取酒使舫載之徧飲坐者意疑倚巴丘酌於君山之上諸子環洞庭而坐酒舫泛泛然觸波濤而往來者乃作歌以長之

石魚湖似洞庭夏水欲滿君山青山爲樽水爲沼酒徒歷歷坐洲島長風連日作大浪不能廢人運酒舫我持長瓢坐巴丘酌飲四座以散愁

宿無爲觀

九疑山深幾千里峰谷崎嶇人不到山中舊有仙姥家十里飛泉遶丹竈如今道士三四人茹芝鍊玉學輕身霓裳羽蓋傍臨壑飄飄似欲來雲鶴



無爲洞口作

無爲洞口春水滿無爲洞傍春雲白愛此踟躕不能去  
令人悔作衣冠客洞旁山僧皆學禪無求無欲亦忘年  
欲問其心不能問我到此中得無悶

說洄溪招退者

在州南  
江華縣

長松亭亭滿四山山間乳竇流清泉洄溪正在此山裏  
乳水松膏常灌田松膏乳水田肥良稻苗如蒲米粒長  
麩色如珈玉液酒酒熟猶聞松節香溪邊老翁年幾許  
長男頭白孫嫁女問言只食松田米無藥無方向人語  
浯溪石下多泉源盛暑大寒冬大溫屠蘇宜在水中石  
洄溪一曲自當門吾今欲作洄溪翁誰能住我舍西東

勿憚山深與地僻羅浮尚有葛仙翁

宿丹崖翁宅

扁舟欲到瀧口湍春水湍瀧上水難投竿來泊丹崖下  
得與崖翁盡一歡丹崖之亭當石顛破竹半山引寒泉  
泉流掩映在木杪有若白鳥飛林間往往隨風作霧雨  
濕人巾履滿庭前丹崖翁愛丹崖棄官幾年崖下家兒  
孫棹船抱酒甕醉裏長歌揮釣車吾將求退與翁遊學  
翁歌醉在魚舟官吏隨人往未得却望丹崖慙復羞

近體詩

橘井

靈橘無根井有泉世間如夢又千年鄉園不見重歸鶴

姓字今爲第幾仙  
風冷露壇人悄悄  
地閑荒徑草絲綿  
如何躡得蘇君跡  
白日霓旌擁上天

欵乃曲

有序

大曆丁未中漫叟以軍事詣都使還州逢春水  
舟行不進作欵乃五首錄四首舟子唱之蓋欲取適  
於道路耳詞曰

湘江二月春水平  
滿月和風宜夜行  
唱撈欲過平陽戍  
守吏相呼問姓名  
千里楓林煙雨深  
無朝無暮有猿吟  
停橈靜聽曲中意  
好是雲山韶濩音  
零陵郡北湘水東  
浯溪形勝滿湘中  
溪口石顛堪自逸

誰能相伴作漁翁

下瀧船似入深淵  
上瀧船似欲昇天  
瀧南始到九疑郡  
應絕高人乘輿船

元季川

季川名融以字行次山之弟次山作處規云季川

曰旣復不言旣有意乎

旣兄之別稱義載爾雅  
字通云旣乃旣字之訛

古體詩

泉上雨後作

風雨蕩繁暑雷息佳霽初  
衆峰帶雲色清氣入我廬  
颯颯涼颼來臨窺愜所圖  
綠蘿長新蔓裊裊垂坐隅  
流水復簷下丹砂發清蕖  
養菖爲我衣種芋爲我蔬  
誰是畹

與畦彌漫連野蕪

山中曉興

河漢降元霜昨來節物殊媿無神仙姿豈有陰陽俱靈  
鳥望不見慨然悲高梧華葉隨風揚珍條雜榛蕪爲君  
寒谷吟歎息知何如

劉春虛

春虛江東人爲夏縣令與賀知章包融張旭號吳  
中四士

明皇雜錄云天寶中劉春虛輩雖有文章盛名流  
落不偶

殷璠云春虛詩情幽興遠思苦語奇忽有所得便

驚衆聽頃東南高唱者數人然聲律婉態無出其  
右唯氣骨不逮諸公自永明已還可傑立江表惜  
其不永天年隕碎國寶

鍾惺酷愛其詩林茂之作小冊全錄之題其後云  
陶公坐高秋俗士不敢入不受人去取孤意先自  
立

古體詩

江南曲

美人何蕩漾湖上風日長玉手欲有贈徘徊雙明璫歌  
聲隨綠水怨色起青陽日暮還家望雲波橫洞房

暮秋揚子江寄孟浩然

劉春虛

木葉紛紛下東南日煙霜林山相曉暮天海空青蒼暝  
色況復久秋聲亦何長孤舟兼微月獨夜仍越鄉寒笛  
對京口故人在襄陽詠思勞今夕江漢遙相望

潯陽陶氏別業

陶家習先隱種柳長江邊朝夕潯陽郭白衣來幾年霽  
雲明孤嶺秋水澄寒天物象自清曠野情何聯綿蕭蕭  
丘中賞明宰非徒然願守黍稷稅歸耕東山田

登廬山峰頂寺

孤峯臨萬象秋氣何高晴天際南郡出林端西江明山  
門二緇叟振錫聞幽聲心照有無界業懸前後生雖知  
真機靜尚與愛網并方首金門路未遑參道情

尋東谿還湖中作

出山更回首日暮清谿深東嶺新別處數猿叫空林昔  
遊有初迹此路還獨尋幽興方在往歸懷復爲今雲峯  
勞前意湖水成遠心望望已超越坐鳴舟中琴

送韓平兼寄郭微

上客夜相過小童能酌酒即爲臨水處正值歸雁後前  
路望鄉山近家見門柳到時春未暮風景自應有余憶  
東州人經年別來久殷勤爲傳語日夕念攜手兼問前  
寄書書中復達否

寄閻防

防時在終南  
豐德寺讀書

青冥南山口君與緇錫鄰溪路入古寺亂花隨暮春紛

紛對寂寞往往落衣巾松色空照水經聲時有人晚心  
復南望山遠情獨親應以修往業亦惟立此身深林度  
空夜煙月資清真莫歎文明日彌年徒隱淪

越中問海客

風雨滄洲暮一帆今始歸自云發南海萬里速如飛初  
謂落何處永將無所依冥茫漸西見山色越中微誰念  
去時遠人經此路稀泊舟悲且泣使我亦霑衣浮海焉  
用說憶鄉難久違縱爲魯連子山路有柴扉

海上詩送薛文學歸海東

何處歸且遠送君東悠悠滄溟千萬里日夜一孤舟曠  
望絕國所微茫天際愁有時近仙境不定若夢遊或見

青色古孤山百里秋前心方杳眇後路勞夷猶離別惜  
吾道風波敬皇休春浮花氣遠思逐海水流日暮驅歌  
後永懷空滄洲

近體詩

九日送人

海上正搖落客中還別離同舟去未已遠送新相知流  
水意何極滿樽徒爾爲從來菊花節早已醉東籬

闕題

道由白雲盡春與青谿長時有落花至遠隨流水香閑  
門向山路深柳讀書堂幽映每白日清輝照衣裳

寄江滔求孟六遺文

南望襄陽路思君情轉親偏知漢水廣應與孟家鄰在  
日貪為善昨來聞更貧相如有遺草一為問家人

積雪為小山

飛雪伴春還春庭曉自閑虛心應任道遇賞遂成山峯  
小形全秀巖虛勢莫攀以幽能皎潔謂近可循環孤影  
臨冰鏡寒光對玉顏不隨遲日盡留顧歲華間

以幽能皎  
潔謂近可  
循環此劉君  
自評其詩也

萬楚

楚登開元進士第

近體詩

五日觀妓

西施謾道浣春紗碧玉今時鬪麗華眉黛奪將萱草色  
紅裙妬殺石榴花新歌一曲令人艷醉舞雙眸斂鬢斜  
誰道五絲能續命却令今日死君家

題情人藥欄

斂眉語芳草何許太無情正見離人別春心相向生

河上逢落花

河水浮落花花流東不息應見浣紗人為道長相憶

王之渙

集異記  
作渙之

之渙并州人與兄之咸之賁皆有文名與王昌齡  
崔國輔聯唱迭和名動一時

近體詩

唐詩卷之第廿一 萬楚 王之渙

登鶴鵲樓

白日依山盡黃河入海流欲窮千里目更上一重樓

送別

楊柳東門樹青青夾御河近來攀折苦應為別離多

涼州詞

黃河遠上白雲間一片孤城萬仞山羌笛何須怨楊柳

春光不度玉門關

集異記云開元中漁之與王昌齡高適齊名共詣旗亭

擁爐以觀焉俄有妙妓四輩奏樂皆當時名部昌齡等私相約曰我輩各擅詩名每不自定甲乙今者可以密觀諸伶所謳若詩入歌詞之多者為優初昌齡詩次謳適詩又次復謳昌齡詩漁之自以得名已久因指諸妓中最佳者曰待此子所唱如非我詩即終身不敢與子爭衡次至雙鬟發聲果謳黃河云云因大諧笑諸伶詰問因語其事乃競拜乞就筵席三人從之飲醉竟日

九日送別

薊庭蕭瑟故人稀何處登高且送歸今日暫同芳菊酒  
明朝應作斷蓬飛

王諲

諲登開元進士第官右補闕

古體詩

夜坐看搗箏

調箏夜坐燈光裏却挂羅帷露織指朱絃一一聲不同  
玉柱連連影相似不知何處學新聲曲曲彈來未覩名  
應是石家金谷裏流傳未滿洛陽城

近體詩

長信怨

王諲

唐詩話卷之八 蕭穎士  
飛燕倚身輕爭人巧笑名生君棄妾意增妾怨君情日  
落昭陽壁秋來長信城寥寥金殿裏歌吹夜無聲

閨情

日暮裁縫歇深嫌氣力微纔能收篋筍懶起下簾帷怨  
坐空然燭愁眠不解衣昨來頻夢見夫壻莫應知

蕭穎士

穎士字茂挺與李華齊名號蕭李開元中登進士  
第補秘書正字聰警絕倫嘗讀路側古碑一閱即  
能成誦名播天下新羅使入朝言國人願得蕭夫  
子爲師其名動華夷如此終以誕傲褊忿困躓而  
卒門人私謚文元先生

穎士以推獎後進爲任如李陽李幼皇甫冉陸渭  
等數十人由獎目皆爲名士天下推知人稱蕭功  
曹嘗兄事元德秀而友殷寅顏真卿柳芳陸據李  
華邵軫趙驂時人語曰殷顏柳陸李蕭邵趙以能  
全其交也

古體詩

江有楓一篇十一章 有序

江有楓思陸鄭二友吳會舊遊且疾讒也臣宦  
於尹府以直方不偶見逼讒佞惟古之賢者有  
避色避言之義矯然去之二室之間有械樹焉  
與江南楓形胥類憇於其下而作是詩以貽夫



二三子焉

江有楓其葉蒙蒙我友自東于以遊從  
山有槭其葉漠漠我友徂北于以休息  
想彼槭矣亦類其楓矧伊懷人而忘其東  
東可遊矣會之丘矣于山于水于廟于寺于亭于里君  
子遊焉于以宴喜其樂亶亶  
粵東可居彼吳之墟有田有庭有朋有書有尊有魚君  
子居焉惟以宴醕其樂徐徐  
我朋在矣彼陸之子如松如杞淑問不已  
我友于征彼鄭之子如琇如英德音孔明  
我思震澤菱芡幕幕寤寐如覲

我思剡谿杉篠萋萋寤寐無迷

有鳥有鳥粵鷗與鷺浮湍戲渚皓然潔素忘其猜妬彼  
何人斯曾足傷懼

此懼惟何懼寘于羅彼驕者子讒言孔多我聞先師體  
命委和公伯之愬則如予何悵然山河惟以嘯歌其憂  
也哉

重陽陪元魯山登北城贈別

時元有挂冠之意

山縣遶古堞悠悠快登望雨餘秋天高目盡無隱狀綿  
連漁川迴杳渺鴉路深彭澤興不淺臨風動歸心賴茲  
琴堂暇傲睨傾菊酒人知歲已登從政復何有遠山十  
里碧一道銜長雲青霞半落日混合疑晴曛漸聞驚栖

羽坐歎清夜月中歡愴有違行子念明發僅能泯寵辱  
未免傷別離江湖不可忘風雨勞相思明時當盛才短  
伎安所設何日謝百里從君漢之滋

蒙山作

東蒙鎮海沂合沓餘百里清秋淨氛靄崖崿隱天起于  
役勞往還息徒暫攀騎將窮絕迹處偶得冥心理雲氣  
雜虹霓松聲亂風水微明綠林際杳窳丹洞裏仙鳥時  
可聞羽人邈難視此焉多深邃賢達昔所秘子尚捐俗  
紛季隨躡遐軌蘊真道彌曠懷古情未已白鹿凡幾遊  
黃精復奚似顧予尚牽纏家業重書史少學務從師壯  
年貴趨仕方馳桂林譽未暇桃源美歲暮期再尋幽哉

羨門子

越江秋曙

扁舟東路遠曉月下江濱激滯信潮上蒼茫孤嶼分林  
聲寒動葉水氣曙連雲瞰日浪中出榜歌天際聞伯鸞  
常去國安道惜離羣延首剡谿近詠言懷數君

山莊月夜作

獻書嗟棄置疲拙歸田園且事計然策將符公冶言桑  
榆清暮景雞犬應遙村蠶罷里閭晏麥秋田野喧澗聲  
連枕簟峰勢入堦軒未奏東山伎先傾北海樽隴瓜香  
早熟庭果落初繁更愜野人意農談朝竟昏

李華

華字遐叔趙郡人舉開元二十三年進士天寶二年博學宏詞皆爲科首天寶十一年拜監察御史除右補闕祿山亂輦母而逃爲盜所得二京復坐謫杭州司功參軍召加司封員外郎將以司言處之華曰焉有隳節辱志者可以荷君之寵乎移病請告李峴領選江南表爲從事以風痺廢居楚嘗爲元德秀墓碑顏真卿書李陽冰篆額時號三絕

古體詩

詠史

昂藏解豸獸出自太平年亂代乃潛伏縱人爲禍愆嘗聞斷馬劍每壯朱雲賢身死名不滅寒風吹墓田精靈

如有在幽憤滿松煙

漢皇修雅樂乘輿臨太學三老與五更天王親割牲一人調風俗萬國和且平單于驟款塞武庫欲銷兵文物此朝盛君臣何穆清至今墳壇下如有簫韶聲

文侯耽鄭衛一聽一忘餐白雪燕姬舞朱絃趙女彈滛聲流不返悵蕩日無端獻歲受朝時鳴鐘讌百官兩牀陳管磬九奏殊未闌對此惟恐卧更能整衣冠

沂水春可涉泮宮映楊葉麗色異人間珊珊搖珮環展禽恒獨處深巷生禾黍城上飛海雲城中暗春雨適來鳴珮者復是誰家女泥沾珠綴履雨濕翠毛簪電影開蓮臉雷聲飛蕙心自言沂水曲采萍兼采綠歸逕雖可

尋天陰光景促憐君貞且獨願許君家宿徒勞惜衾枕  
子不顧雙娥艷質誠可重淫風如禮何

寄趙七侍御

有序

自餘干谿行經弋陽至上饒山川幽麗思與雲  
卿同遊邈不可得因叙疇年之素寄懷於篇云  
搖漿曙江流江清山復重心愜賞未足川迴失前峰凌  
灘出極浦曠若天池通君陽青嵯峨開拆混元中九潭  
魚龍窟仙成羽人宮陰奧潛鬼物精光動煙空元猿啼  
溪龍白鳥戲葱蒙飛湍鳴金石激溜鼓雷風雨濯萬木  
鮮霞照千山濃草閑長餘綠花靜落幽紅渚煙見晨釣  
山月聞夜春覆谿窈窕波涵石淘溶溶丹丘忽聚散素

壁相奔衝白日破昏靄靈山出其東勢排昊蒼上氣壓  
吳越雄迴頭望雲卿此恨發吾衷昔日蕭邵遊四人纔  
成童屬詞慕孔門入仕希上公緯卿陷非罪折我昆吾  
鋒茂挺獨先覺拔身渡京虹斯人謝明代百代墜鷓鴣  
世故墜橫流與君哀路窮相顧無死節蒙恩逐殊封天  
波洗其瑕朱衣備朝容一別凡十年豈期復相從餘生  
得攜手遺此兩孱翁羣遷失鶯羽後凋惜長松衰旅難  
重別悽悽滿心曾遇勝悲獨遊貪奇悵孤逢禽尚彼何  
人胡爲束樊籠吾師度門教投弁躡遐蹤

仙遊寺

有龍潭穴  
弄玉祠

捨事入樵逕雲木深谷口萬壑移晦明千峰轉前後巖

然龍潭上石勢若奔走開拆秋天光崩騰夏雷吼靈谿  
自茲去紆直互紛糾聽聲靜復喧望色無更有冥冥翠  
微下高殿映杉柳滴滴洞穴中懸泉響相扣昔時秦王  
女羽化年代久日暮松風來簫聲生左右早窺神仙錄  
願結芝朮友安得羨門方青囊繫吾肘

春遊吟

初春遍芳甸千里藹盈曛美人摘新英步步翫春綠所  
思杳何處宛在吳江曲可憐不得共芳菲日暮歸來淚  
滿衣

近體詩

長門怨

弱柳鴛鴦薦啼妝翡翠衾鴉鳴秋殿曉人靜禁門深每  
憶椒房寵那堪永巷陰自驚羅帶緩非復舊來心

奉使朔方贈郭都護

絕塞臨光祿孤營佐貳師鐵衣三月冷金鼓朔風悲都  
護徵兵日將軍破鹵時揚鞭玉關道回首望旌旗

春行寄興

宜陽城下草萋萋澗水東流復向西芳樹無人花自落  
春山一路鳥空啼

于逖

逖天寶間詩人獨孤及李白皆有詩贈之

古體詩

野外作

老病無樂事歲秋悲更長窮郊日蕭索生意已蒼黃小  
弟髮亦白兩男俱不強有才且未達況我非賢良幸以  
朽鈍姿野外老風霜寒鷗噪晚景喬木思故鄉魏人宅  
蓬池結網佇鱸魴水清魚不來歲暮空彷徨

憶舍弟

衰門少兄弟兄弟唯兩人飢寒各流浪感念傷我神夏  
期秋未來安知無他因不怨別天長但願見爾身茫茫  
天地間萬類各有親安知汝與我乖隔同胡秦何時對  
形影憤懣當共陳

張彪

彪蓋穎洛間靜者天寶末將母避亂杜子美嘗以  
詩寄張十二山人彪云

古體詩

古別離

別離無遠近事歡情亦悲不聞車輪聲後會將何時去  
日忘寄書來日乖前期縱知明當返一息千萬思

趙微明

微明詩見篋中集

古體詩

回軍跋者

既老又不全始得離邊城一枝假枯木步步向南行去

張彪

趙微明

時日一百來時月一程常恐道路傍掩棄狐兔瑩所願  
死鄉里到日不願生聞此哀怨調念念不忍聽惜無異  
人術倏忽具爾形

思歸

為別未幾日去日如三秋猶疑望可見日日上高樓惟  
見分手處白蘋滿芳洲寸心寧死別不忍生離憂

賀蘭進明

進明開元十六年進士祿山亂以御史大夫為節  
度守臨淮張巡乞師不應至德中為南海太守嶺  
南節度使終負外郎  
殷璠云負外所著述百餘篇頗究天人之際又有

古詩八十首大體符於阮公行路難五首並多新  
興

古體詩

行路難

君不見巖下井百尺不及泉君不見山上苗數寸凌雲  
煙人生相命亦如此何苦太息自憂煎但願親友長含  
笑相逢莫乏杖頭錢寒夜邀歡須秉燭豈不長思花柳  
年

君不見門前柳榮耀暫時蕭索久君不見陌上花狂風  
吹去落誰家鄰家思婦見之歎蓬首不梳心歷亂盛年  
夫婿長別離歲莫相逢色凋換

君不見芳樹枝春花落盡蜂不窺君不見梁上泥秋風  
始高燕不棲蕩子從軍事征戰蛾眉嬋娟守空閨獨宿  
自然堪下淚況復時聞烏夜啼

君不見雲中月暫盈還復缺君不見林下風聲遠意難  
窮親故平生或聚散歡娛未盡樽酒空歎息青青陵上  
柏歲寒能有幾人同

君不見東流水一去無窮已君不見西郊雲日夕空氣  
氤羣雁徘徊不能去一雁驚鳴復失羣人生結交在終  
始莫以升沉中路分

李嶷

嶷詩鮮潔有規矩其少年三首詞雖不多翩翩然

俠氣在目也

古體詩

淮南秋夜呈周侶

與侃同

天淨河漢高夜閑砧杵發清秋忽如此離恨應難歇風  
亂池上萍露光竹間月與君共遊處勿作他鄉別

近體詩

林園秋夜作

林卧避殘暑白雲長在天賞心既如此對酒非徒然月  
色偏秋露竹聲兼夜泉涼風懷裏裏茲意與誰傳

少年行

十八羽林郎戎衣侍漢王臂鷹金殿側挾彈玉輿傍馳



道春風起陪遊出建章

侍獵長楊下承恩更射飛塵生馬影滅箭落雁行稀薄  
暮隨天仗聯翩入瑣闈

玉劔膝邊橫金杯馬上傾朝遊茂陵道夜宿鳳凰城豪  
吏多猜忌毋勞問姓名

芮挺章

挺章天寶進士常依秘書監陳公國子司業蘇公

編國秀集三卷

近體詩

江南弄

春江可憐事最在美人家鸚鵡能言鳥芙蓉巧笑花地

銜金作埒水抱玉爲沙薄晚青絲騎長鞭赴狹斜

少年行

任氣稱張放銜恩在少年玉階朝就日金屋夜昇天軒  
騎青雲際笙歌綠水邊建章明月好留醉伴風煙

御定全唐詩錄卷第十八

Blank space with vertical lines for text.

御定全唐詩錄卷第十九

禮部侍郎臣徐倬翰林院侍讀學士臣徐元正奉

旨校刊

王季友

季友河南人按豫章圖經云鄴城人家貧賣履博  
極群書李勉引為賓客甚敬之善為詩杜甫詩云

鄴城客子王季友是也

殷璠云季友詩愛奇務險遠出常情之外然而白

古體詩

雜詩

采山仍采隱在山不在深持斧事遠遊固悲匠者心翳  
翳青桐枝樵爨日所侵樵聲出巖壑四聽無知音豈爲  
鼎下薪當復堂上琴鳳鳥久不棲且與枳棘林

滑中贈崔高士瓘

夫子保藥命外身得无咎日月不能老化腸爲筋否十  
年前見君甲子過我壽于何今相逢華髮在我後近而  
知其遠少見今白首遙信蓬萊宮不死世世有元石采  
盈擔神方秘其肘問家惟指雲愛氣常言酒攝生固如  
此履道當不朽未能太元同願亦天地久實腹以芝朮  
賤體仍芻狗自勉將勉余良藥在苦口

寄韋子春秘書

出山秘芸署山木已再春食我山中藥不憶山中人山  
中誰余密白髮日相親雀鼠晝夜無知我厨廩貧有情  
盡捐棄土石爲周身依依舍北松不厭我南鄰夫子質  
千尋天澤枝葉新余以不材壽非智免斧斤

還山留別長安知己

出山不見家還山見家在山門是門前此去長樵採青  
谿誰招隱白髮自相待惟餘澗底松依依色不改

代賀若令譽贈沈千運

相逢問姓名亦存別時無子今有孫山上雙松長不改  
百家唯有三家村村南村西車馬道一宿通舟水浩浩  
澗中磊磊十里石河上淤泥種桑麥平坡塚墓皆我親

滿田主人是舊客舉聲酸鼻問同年十人七人歸下泉  
分手如何更此地回頭不語淚潸然

酬李十六岐

鍊丹文武火未成賣藥販履俱逃名出谷迷行洛陽道  
乘流醉卧滑臺城城下故人久離怨一歡適我兩家願  
朝飲杖懸沽酒錢暮餐囊有松花飯于何車馬日憧憧  
李膺門館爭登龍千賓揖對若流水五經發難如叩鐘  
下筆新詩行滿壁立談古人坐在席問我草堂有卧雲  
知我山儲無儋石自耕自刈食爲天如鹿如麋飲野泉  
亦知世上公卿貴且養丘中草木年

宿東谿李十五山亭

上山下山入山谷谿中落日留我宿松石依依當主人  
主人不在意亦足名花出地兩重階絕頂平天一小齋  
本意由來是山水何用相逢語舊懷

觀于舍人壁畫山水

野人宿在人家少朝見此山謂山曉半壁仍棲嶺上雲  
開簾欲放湖中鳥獨坐長松是阿誰再三招手起來遲  
于公大笑向予說小弟丹青能爾爲

張志和

志和字子同婺州人始名龜齡母夢楓生腹上而  
產擢明經肅宗命待詔翰林因賜今名後坐貶不  
復仕居江湖自稱煙波釣徒著元真子亦以自號

時謂嚴光之比

古體詩

漁父歌

西塞山前白鷺飛  
桃花流水鱖魚肥  
青箬笠綠蓑衣  
斜風細雨不須歸  
釣臺漁父褐爲裘  
兩兩三三舴艋舟  
能縱棹慣乘流  
長江白浪不曾憂  
雪谿灣裏釣漁翁  
舴艋爲家西復東  
江上雪浦邊風笑  
著荷衣不歎窮  
松江蟹舍主人歡  
菰飯蕪羹亦共餐  
楓葉落荻花乾  
醉宿漁舟不覺寒

青草湖中月正圓  
巴陵漁父棹歌連  
釣車子橈頭船樂  
在風波不用仙

近體詩

漁父

八月九日蘆花飛  
南谿老人垂釣歸  
秋山入簾翠滴滴  
野艇倚檻雲依依  
却把漁竿尋小逕  
閑梳鶴髮對斜暉  
翻嫌四皓曾多事  
出爲儲皇定是非

沈千運

千運吳興人元結篋中集序云風雅不作幾及千  
年近世作者更相沿襲拘限聲病喜尚形似且以  
流易爲辭不知喪於雅正吳興沈千運獨挺於流

俗之中強攘於已溺之後窮老不惑五十餘年凡  
所爲文皆與時異故朋友後生稍見師效能似類  
者有五六人於戲自沈公及二三子皆以正直而  
無祿位皆以忠信而久貧賤皆以仁讓而至喪亡  
兵興于今六歲已長逝者遺文散失方阻絕者不  
見近作故編於篋中者凡二十四首云

古體詩

贈史修文

故人阻千里會面非前期握手於此地當歡反成悲念  
離宛猶昨俄已二十暮疇昔皆少年別來鬢如絲不道  
舊姓名相逢知是誰曩遊盡騫翥與君仍布衣豈曰無

其才命理應有時別路漸欲少不覺生涕洟

汝墳示弟妹

今日天氣暖東風杏花坼筋力久不如却羨澗中石神  
仙杳難信中壽稀滿百近世多天傷喜見鬢髮白杖藜  
竹樹間宛見舊行跡豈知林園主却是林園客兄弟所  
存半空爲亡者惜冥冥無再期哀哀望松柏骨月能幾  
人年大自疎隔性情誰免此與我不相易唯念得爾輩  
相看慰朝夕平生茲已矣此外盡非適

濮中言懷

聖朝優賢良草澤無遺匿人生各有命在余胡不淑一  
生但區區五十無寸祿衰退當棄捐貧賤招毀讟栖栖

去人世屯躓日窮迫不如守田園歲晏望豐熟壯年失  
宜盡老大無筋力始愴前計非將貽後生福童兒新學  
稼少女未能織顧此煩知已終日求衣食

山中作

棲隱別無事所願離風塵不辭城邑遊禮樂拘束人邇  
來歸山林庶事皆吾身何者爲形骸誰是智與仁寂寞  
了閑事而後知天真咳唾矜榮華迂俯相屈伸何如巢  
與由天子不得臣

古歌

北邙不種田但種松與栢松栢未生處留待市朝客

孟雲卿

雲卿平昌人第進士爲校書郎與杜甫元結最善

按元結送孟校書往南海書序云雲卿與次山同  
里以辭學相友善

袁郊甘澤謠云陶峴開元中與樊口進士雲卿奏  
清商曲於江湖號水仙是雲卿爲武昌人

高仲武云孟君詩祖述沈千運賊中十首又漁獵  
陳拾遺詞氣傷苦怨者之流

古體詩

古別離

朝日上高臺離人怨秋草但見萬里天不見萬里道君  
行本迢遠苦樂良難保宿昔夢同衾憂心常傾倒含酸

欲誰訴展轉傷懷抱結髮年已遲征行去何早寒暄有時謝憔悴難再好人皆算年壽死者何曾老少壯無見期水溪風浩浩

今別離

結髮生別離相思復相保如何日已久五變中庭草渺渺大海途悠悠吳江島但恐不出門出門無遠道遠道行既難家貧衣復單嚴風吹積雪晨起鼻何酸人生各有志豈不懷所安分明天上日生死願同歡

鄴城懷古

朝發洪水南將尋北燕路魏家舊城闕寥落無人住伊昔天地屯曹公獨中據群臣將北面白日忽西暮三臺

竟寂莫萬事良難固雄豪安在哉衰草沾霜露崔巍長河北尚見應劉墓古樹藏龍蛇荒茅伏狐兔永懷故池館數子連章句逸興驅山河雄詞變雲霧我行覩遺跡精爽如可遇斗酒將酌君悲風白楊樹

傷懷贈故人

稍稍晨鳥翔淅淅草上霜人生早罹苦壽命恐不長二十學已成三十名不彰豈無同門友貴賤易中腸驅馬行萬里悠悠過帝鄉幸因絃歌未得上君子堂衆樂互喧奏獨子備笙簧坐中無知音安得神揚揚願因高風起上感白日光

傷情



爲長心易憂早孤意常傷出門先躊躇入戶亦彷徨此生亦何苦前事安可忘兄弟先我没孤幼盈我旁舊居近東南河水新爲梁松栢今在茲安忍思故鄉四時與日月萬物各有常秋風已一起草木無不霜行行當自勉不忍再思量

汴河阻風

清晨自梁宋挂席之楚荆出浦風漸惡傍灘舟欲橫大河噴東注羣動皆窅冥白霧魚龍氣黑雲牛馬形蒼茫迷所適安危懼暫寧信此天地內孰爲身命輕丈夫苟未達所向須存誠前路捨舟去東南仍曉晴

近體詩

寒食

二月江南花滿枝他鄉寒食遠堪悲貧居往往無煙火不獨明朝爲子推

張謂

謂字正言河南人登天寶二年進士第奉使長沙嘗作長沙風土記大曆中爲禮部侍郎典貢舉殷璠云謂代北州老翁荅及湖中對酒行並在物情之外衆人未曾說耳亦何必歷遐遠探古迹然後始爲冥搜

古體詩

讀後漢逸人傳

孟雲卿 張謂

子陵沒已久讀史思其賢誰謂潁陽人千秋如比肩嘗  
聞漢皇帝曾是曠周旋名位苟無心對君猶可眠東過  
富春渚樂此佳山川夜卧松下月朝看江上煙釣時如  
有待釣罷應忘筌生事在林壑悠悠經暮年于今七里  
瀨遺迹尚依然高臺竟寂莫流水空潺湲

龐公南郡人家在襄陽里何處偏來往襄陽東陂是誓  
將業田種終得保妻子何言二千石乃欲勸吾仕鸛鵲  
巢茂林黿鼉穴深水萬物從所從吾心亦如此不見鹿  
門山朝朝白雲起采藥復采樵優游終暮齒

代北州老翁答

負薪老翁住北州北望鄉關生客愁自言老翁有三子

兩人已向黃沙死如今小兒新長成明年聞道又徵兵  
定知此別必零落不及相隨同死生盡將田宅借鄰伍  
且復伶俜去鄉土在生本求多子孫及有誰知更辛苦  
近傳天子尊武臣強兵直欲靜邊塵安邊自合有長策  
何必流離中國人

湖上對酒行

夜坐不厭湖上月晝行不厭湖上山眼前一樽又長滿  
心中萬事如等閑主人有黍百餘石濁醪數斗應不惜  
即今相對不盡歡別後相思復何益茱萸灣頭歸路賒  
願君且宿黃公家風光若此人不醉參差辜負東園花

贈喬琳

一作劉春虛詩

去年上策不見收今年寄食仍淹留羨君有酒能便醉  
羨君無錢能不憂如今五侯不愛客羨君不問五侯宅  
如今七貴方自尊羨君不過七貴門丈夫會應有知己  
世上悠悠何足論

近體詩

送裴侍御歸上都

楚地勞行役秦城罷鼓鞶舟移洞庭岸路出武陵谿江  
月隨人影山花趁馬蹄離魂將別夢先已到關西

道林寺送莫侍御

何處堪留客香林隔翠微薜蘿通驛騎山竹挂朝衣霜  
引臺鳥集風驚塔雁飛飲茶勝飲酒聊以送將歸

別睢陽故人

少小客遊梁依然似故鄉城池經戰陣人物恨存亡夏  
雨桑條綠秋風麥穗黃有書無寄處相送一沾裳

郡南亭子宴

亭子春城外朱門向綠林柳枝經雨重松色帶煙深漉  
酒迎山客穿池集水禽白雲常在眼聊足慰人心

夜同晏用人字

北斗回新歲東園值早春竹風能醒酒花月解留人邑  
宰陶元亮山家鄭子真平生頗同道相見日相親

過從弟制疑官竹齋

羨爾方爲吏衡門獨宴如野猿偷紙筆山鳥污圖書竹

裏藏公事花間隱使車不妨垂釣坐時鱸小江魚

同王徵君湘中有懷

八月洞庭秋瀟湘水北流還家萬里夢爲客五更愁不  
用開書帙偏宜上酒樓故人京洛滿何日復同遊

同諸公遊雲公禪寺

共許尋雞足誰能惜馬蹄長空淨雲雨斜日半虹霓簷  
下千峰轉窓前萬木低看花尋徑遠聽鳥入林迷地與  
喧卑隔人將物我齊不知樵客意何事武陵谿

別韋郎中

星軺計日赴岷峨雲樹連天阻笑歌南入洞庭隨雁去  
西過巫峽聽猿多崢嶸洲上飛黃蝶灑瀕堆邊起白波

不醉郎中桑落酒教人無奈別離何

杜侍御送貢物戲贈

銅柱朱崖道路難伏波橫海舊登壇越人自貢珊瑚樹  
漢使何勞獬豸冠疲馬山中愁日晚孤舟江上畏春寒  
由來此貨稱難得多恐君王不忍看

春園家宴

南園春色正相宜大婦同行小婦隨竹裏登樓人不見  
花間覓路鳥先知櫻桃解結垂簷子楊柳能低入戶枝  
山簡醉來歌一曲參差笑殺郢中兒

西亭子言懷

數叢芳草在堂陰幾處閑花映竹林攀樹元猿呼郡吏

傍谿白鳥應家禽青山看景知高下流水聞聲覺淺深  
官屬不令拘禮數時時緩步一相尋

送盧舉使河源

故人行役向邊州匹馬今朝不少留長路關山何日盡  
滿堂絲竹爲君愁

題長安主人壁

世人結交須黃金黃金不多交不深縱令然諾暫相許  
終是悠悠行路心

早梅

一樹寒梅白玉條迴臨村路傍谿橋不知近水花先發  
疑是經春雪未消

張巡

巡鄧州南陽人與兄曉皆以文行知名舉進士天  
寶中授清河令有能名調真源令祿山反與睢陽  
太守許遠嬰城自守經年乏食忠義不衰城陷遇  
害

近體詩

聞笛

岌堯試一臨虜騎附城陰不辨風塵色安知天地心營  
開邊月近戰苦陣雲深旦夕更樓上遙聞橫笛音

守睢陽作

接戰春來苦孤城日漸危合圍侷月暈分守若魚麗屢

厭黃塵起時將白羽揮  
裹瘡猶出陣飲血更登陣  
忠信應難敵堅貞諒不移  
無人報天子心計欲何施

顏真卿

真卿字清臣瑯琊人少勤學業有詞藻尤工書開元中舉進士事親以孝聞累遷侍御史武部員外不附楊國忠出爲平原太守祿山反河朔盡陷平原獨守肅宗幸靈武授工部尚書至德初朝于鳳翔授憲部尚書累進封魯郡公以忤宰相意出刺撫州湖州元載伏誅拜刑部尚書改太子太師李希烈反盧杞奏遣真卿往諭之不屈遇害

古體詩

題杼山癸亭得暮字

亭陸鴻漸所創

杼山多幽絕勝事盈跬步前者雖登攀淹留恨晨暮及茲紆勝引曾是美無度歛構三癸亭實惟陸生故高賢能徇物疏鑿皆有趣不越方丈間居然雲霄遇巍峩倚脩岫曠望臨古渡左右苔石攢低昂桂枝蠹山僧狎猿狖巢鳥來枳椇俯視何楷臺傍瞻戴顓路遲迴未能下夕照明村樹

謝陸處士杼山折青桂花見寄之什

羣子遊杼山山寒桂花白綠萼含素萼采折自逋客忽枉巖中詩芳香潤金石全高南越蠹豈謝東堂策會愜名山期從君恣幽覲

顏真卿

李白

贈裴將軍

大君制六合猛將清九垓戰馬若龍虎騰凌何壯哉將  
軍臨八荒烜赫耀英材劍舞若游電隨風縈且迴登高  
望天山白雲正崔巍入陣破強寇威名雄震雷一射百  
馬倒再射萬夫開匈奴不敢敵相呼歸去來功成報天  
子可以畫麟臺

近體詩

登平望橋下作

登橋試長望望極與天平際海蒹葭色終朝鳧雁聲近  
山猶髣髴遠水忽微明更覽諸公作知高題柱名  
刻清遠道士詩因而繼作

不到東山寺于今五十春揭來從舊賞林壑宛相親吳  
子多藏日秦王厭勝辰劍池穿萬仞盤石坐千人金氣  
騰爲虎琴臺化若神登壇仰生一捨宅歎珣珉中嶺分  
雙樹迴巒絕四鄰窺臨江海接崇飾四時新客有神仙  
者於茲雅麗陳名高清遠峽文聚斗牛津跡異心寧間  
聲同質豈均悠然千載後知我揖光塵

任華

華爵里未詳按撫言華與庾中丞書云華本野人  
嘗思漁釣尋常杖策歸乎舊山非有機心致斯扣  
擊是必狂狷之流也

松石軒詩評云任華之作如疾雷轡空長風蹴浪

飛電沓影重雲滿盈脩開脩闔一朗一晦凜耳疊  
目吁可怪也

古體詩

寄李白

古來文章有奔逸氣聳高格清人心神驚人魂魄我聞  
當今有李白大獵賦鴻猷文嗤長卿笑子雲班張所作  
瑣細不入眼未知卿雲得在嗤笑限登廬山觀瀑布海  
風吹不斷江月照還明余愛此兩句登天台望渤海雲  
垂大鵬飛山壓巨鼇背斯言亦好在至于他作多不拘  
常律振擺超騰既俊且逸或醉中操紙或興來走筆手  
下忽然片雲飛眼前劃見孤峯出而我有時白日忽欲

睡睡覺歛然起攘臂任生知有君君也知有任生未中  
間聞道在長安及余戾止君已江東訪元丹邂逅不得  
見君面每常把酒向東望良久見說往年在翰林曾中  
矛戟何森森新詩傳在宮人口佳句不離明主心身騎  
天馬多意氣目送飛鴻對豪貴承恩召入凡幾迴待詔  
歸來仍半醉權臣妬盛名羣犬多吠聲有勅放君却歸  
隱淪處高歌大笑出關去且向東山爲外臣諸侯交迓  
馳朱輪白璧一雙買交者黃金百鎰相知人平生傲岸  
其志不可測數十年爲客未嘗一日低顏色八詠樓中  
坦腹眠五侯門下無心憶繁花越臺上細柳吳宮側綠  
水青山知有君白雲明月偏相識養高兼養閑可望不



可攀莊周萬物外  
范蠡五湖間  
人傳訪道滄海上  
丁令王喬每還往  
蓬萊經是曾到來  
方丈豈唯方一丈  
伊余每欲乘興遠  
相尋江湖擁隔勞寸心  
今朝忽遇東飛翼  
寄此一章表曾臆  
儻能報我一片言  
但訪任華有人識

寄杜拾遺

杜拾遺名甫第二才甚奇  
任生與君別來已多時  
何嘗一日不相思  
杜拾遺知不知  
昨日有人誦得數篇黃絹詞  
吾怪異奇特借問果然稱是杜二之所為  
勢攫虎豹氣騰蛟螭  
滄海無風似鼓蕩  
華嶽平地欲奔馳  
曹劉俯仰慙大敵  
沈謝逡巡稱小兒  
昔在帝城中盛名君一個  
諸人見所作無不心膽破  
郎官叢裏作狂歌  
丞相閣中

常醉卧前年皇帝歸  
長安承恩濶步青雲端  
積翠扈遊花匝披香寓  
直月團欒英才特達承  
天睠公卿無不相欽羨  
只緣汲黯好直言  
遂使安仁却為掾  
如今避地錦城隅  
幕下英寮每日相隨提玉壺  
半醉起舞捋髭鬚  
乍低乍昂傍若無  
古人制禮但為防俗士  
豈得為君設之乎  
而我不飛不鳴亦何以  
只待朝廷有知己  
已曾讀却無限書拙詩  
一句兩句在人耳  
如今看之揔無益  
又不能崎嶇傍朝市  
且當事耕稼  
豈得便徒爾  
南陽葛亮為友朋  
東山謝安作鄰里  
閑常把琴弄  
悶即攜樽起  
鶯啼二月三月時  
花發千山萬山裏  
此時幽曠無人知  
火急將書憑驛使  
為報杜拾遺

懷素上人草書歌

吾嘗好奇古來草聖無不知豈不知右軍與獻之雖有  
壯麗之骨恨無狂逸之姿中間張長史獨放蕩而不羈  
以顛爲名傾蕩于當時張老顛殊不顛于懷素懷素顛  
乃是顛人謂爾從江南來我謂爾從天上來負顛狂之  
墨妙有墨狂之逸才狂僧前日動京華朝騎王公大人  
馬暮宿王公大人家誰不造素屏誰不塗粉壁粉壁搖  
晴光素屏凝曉霜待君揮灑今不可彌忘駿馬迎來坐  
堂中金盆盛酒竹葉香十盃五盃不解意百盃已後始  
顛狂一顛一狂多意氣大叫一聲起攘臂揮毫倏忽千  
萬字有時一字兩字長丈二翕若長鯨撥刺動海島歛

若長蛇成律透深草回環繚繞相拘連千變萬化在眼  
前飄風驟雨相擊射速祿颯拉動簷隙擲華山巨石以  
爲點掣衡山陣雲以爲畫興不盡勢轉雄恐天低而地  
窄更有何處最可憐裊裊枯藤萬丈懸萬丈懸拂秋水  
映秋天或如絲或如髮風吹欲絕又不絕鋒芒利如歐  
冶劍勁直渾是并州鐵時復枯燥何離褊忽覺陰山突  
兀橫翠微中有枯松錯落一萬丈倒挂絕壁蹙枯枝干  
魑魅兮萬魍魎欲出不可何閃屍又瀚海日暮愁陰濃  
忽然躍出千黑龍天矯偃蹇入乎蒼穹飛沙走石滿穹  
塞萬里颼颼西北風狂僧有絕藝非數仞高牆不足以  
逞其筆勢或逢花箋與綃素凝神執筆守恒度別來筋

骨多情趣霏霏微微點長露三秋月照丹鳳樓二月花  
開上林樹終恐絆騏驎之足不得展千里之步狂僧狂  
僧爾雖有絕藝猶當假良媒不因禮部張公將爾來如  
何得聲名一旦喧九垓

張若虛

若虛開元初人與賀知章張旭號吳中四士

古體詩

春江花月夜

春江潮水連海平海上明月共潮生滌滌隨波千萬里  
何處春江無月明江流宛轉繞芳甸月照花林皆似霰  
空裏流霜不覺飛汀上白沙看不見江天一色無纖塵

皎皎空中孤月輪江畔何人初見月江月何年初照人  
人生代代無窮已江月年年祇相似不知江月待何人  
但見長江送流水白雲一片去悠悠青楓浦上不勝愁  
誰家今夜扁舟子何處相思明月樓可憐樓上月徘徊  
應照離人妝鏡臺玉戶簾中卷不去擣衣砧上拂還來  
此時相望不相聞願逐月華流照君鴻雁長飛光不度  
魚龍潛躍水成文昨夜閑潭夢落花可憐春半不還家  
江水流春去欲盡江潭落月復西斜斜月沈沈藏海霧  
碣石瀟湘無限路不知乘月幾人歸落月搖晴滿江樹

近體詩

代荅閨夢還

李太白

張若虛

李適之

關塞年華早樓臺別望違試衫着暖氣開鏡覓春暉燕  
入窺羅幕蜂來上畫衣情催桃李豔心寄管絃飛妝洗  
朝相待風花暝不歸夢魂何處入寂寂掩重扉

李適之

適之一名昌恒山王承乾之孫神龍初拜左衛郎  
開元中歷官至刑部尚書雅好賓客飲酒一斗不  
亂天寶中為左相累封清和縣公與李林甫不叶  
為其陰中罷知政事貶宜春太守

近體詩

罷相作

避賢初罷相樂聖且銜杯借問門前客今朝幾箇來

蔣冽

冽義興人進士及第歷禮吏戶三部侍郎尚書左  
丞見高智周傳

近體詩

南谿別業

結宇依青嶂開軒對綠疇樹交花兩色谿合水同流竹  
徑春來掃蘭樽夜不收逍遙自得意鼓腹醉中遊

金昌緒

昌緒餘杭人

近體詩

春怨

打卻黃鶯兒莫教枝上啼啼時驚妾夢不得到遼西

殷遙

遙句容人天寶間終於忠王府倉曹參軍

殷璠云遙詩閑雅善用聲律

近體詩

山行

寂歷青山曉山行趣不稀野花成子落江燕引雛飛暗  
草薰苔徑晴楊掃石磯俗人猶詣此余亦轉忘歸

陶峴

峴淵明之後開元末家崑山豐田疇

近體詩

西塞山下迴舟作

匡廬舊業是誰主吳越新居安此生白髮數莖歸未得  
青山一望計還成鴉翻楓葉夕陽動鷺立蘆花秋水明

從此舍舟何所詣酒旗歌扇正相迎紀事云峴泛遊江湖自製  
三舟與孟彥深孟雲卿焦  
燧共載吳越之士號為水仙省親南海獲崑崙奴名摩訶善遊水至西塞山下泊  
舟吉祥佛舍見江水深黑謂必有怪物投劍命摩訶下取久之支體磔裂浮于水  
上峴流涕迴棹賦詩  
自叙不復遊江湖矣

韋建

建嘗與蕭頴士遊見頴士傳

近體詩

泊舟盱眙

泊舟淮水次霜降夕流清夜久潮侵岸天寒月近城平

沙依雁宿候館聽雞鳴鄉國雲霄外誰堪羈旅情

吳筠

筠字真節魯中儒士也舉進士不第依潘師正爲道士善著述明皇聞其名遣使徵至待詔翰林高力士素奉釋短筠于上前乃堅求還山東遊會稽往來天台剡中與李白孔巢父詩篇酬和終于越中弟子私謚宗元先生所著文賦深詆釋氏爲通人所譏然文彩煥發每製一篇人皆傳寫

近體詩

步虛詞

紫府與元洲誰來物外遊無煩騎白鹿不用駕青牛金

化顏應駐雲飛鬢不秋仍聞碧海上更用玉爲樓  
玉樹雜金花天河織女家月邊丹鳳鳥風送紫鸞車霧  
縠籠綃帶雲屏列錦霞瑤臺千萬里不覺往來賒

賈至

至字幼鄰洛陽人曾之子擢明經第爲單父尉明  
皇幸蜀拜起居舍人知制誥撰肅宗冊文帝曰昔  
先天誥命乃父爲之今又爾爲之兩朝盛典出卿  
家父子手可謂繼美累封信都縣伯以右散騎常  
侍卒謚曰文

古體詩

送耿副使歸長沙

全唐詩錄卷之九 賈至

畫舸欲南歸江亭且留宴日暮湖上雲蕭蕭若流霞昨夜相知者明發不可見惆悵西北風高帆爲誰扇

寓言

凜凜秋閨夕綺羅早知寒玉砧調鳴杵始擣機中紈憶昨別離日桐花覆井欄今來思君時白露盈堦溥聞有關河信欲寄雙玉盤玉以委貞心盤以薦嘉餐嗟君在萬里使妾衣帶寬

巴陵寄李二戶部張十四禮部

時貶岳州司馬

江南春草初萋萋愁殺江南獨愁客秦中楊柳也應新轉憶秦中相憶人萬里鶯花不相見登高一望淚沾巾

近體詩

侍宴曲

雲陛褰珠扆天墀覆綠楊隔簾妝隱映向席舞低昂鳴佩長廊靜開冰廣殿涼歡餘劍履散同輦入昭陽

岳陽樓宴王負外貶長沙

極浦三春草高樓萬里心楚山晴靄碧湘水暮流深忽與朝中舊同爲澤畔吟停杯試北望還欲淚沾巾

詠馮昭儀當熊

白羽插雕弓蛺蝶動朔風平明出金屋扈輦上林中逐獸長廊靜呼鷹御苑空王孫莫諫獵賤妾解當熊

早朝大明宮呈兩省僚友

銀燭朝天紫陌長禁城春色曉蒼蒼千條弱柳垂青瑣

百轉流鶯繞建章  
劍珮聲隨玉墀步  
衣冠身惹御爐香  
共沐恩波鳳池上  
朝朝染翰侍君王

白馬

白馬紫連乾  
嘶鳴丹闕前  
聞珂自蹀躞  
不要下金鞭

贈薛瑤英

舞却銖衣重  
笑疑桃臉開  
方知漢成帝  
虛築避風臺

春思

草色青青柳色黃  
桃花歷亂李花香  
東風不爲吹愁去  
春日偏能惹恨長  
紅粉當壚弱柳垂  
金花臘酒解醪醑  
笙歌日暮能留客  
醉殺長安輕薄兒

送李侍郎赴常州

雪晴雲散北風寒  
楚水吳山道路難  
今日送君須盡醉  
明朝相憶路漫漫

岳陽樓重宴別王八員外貶長沙

江路東連千里潮  
青雲北望紫微遙  
莫道巴陵湖水濶  
長沙南畔更蕭條

初至巴陵與李十二白裴九同泛洞庭湖

楓岸紛紛落葉多  
洞庭秋水晚來波  
乘興輕舟無近遠  
白雲明月弔湘娥

西亭春望

日長風暖柳青青  
北雁歸飛入窅冥  
岳陽城上聞吹笛



能使春心滿洞庭

御定全唐詩錄卷第十九

*[Faint bleed-through text from the reverse side of the page]*

御定全唐詩錄卷第二十

禮部侍郎臣徐倬翰林院侍讀學士臣徐元正奉

旨校刊

李白

白字太白興聖皇帝九世孫其先隋末以罪徙西域神龍初遁還客巴西白之生母夢長庚星因以命之十歲通詩書既長隱岷山州舉有道不應蘇頲為益州長史見白異之曰是子天才奇特少盆以學可比相如然喜縱橫術擊劍為任俠輕財重施更客任城與孔巢父韓準裴政張叔明陶沔居徂徠山日沈飲號竹溪六逸天寶初南入會稽與

全唐詩錄卷第二十 李白

全唐詩話卷之三  
吳筠善筠被召故白亦至長安往見賀知章知章見其文歎曰子謫仙人也言於明皇召見金鑾殿論當世事奏頌一篇帝賜食親為調羹有詔供奉翰林白猶與飲徒醉於市帝坐沉香亭子意有所感欲得白為樂章召入而白已醉左右以水頰面稍解援筆成文婉麗精切無留思帝愛其才數宴見白嘗侍帝醉使高力士脫鞵力士素愧耻之摘其詩以激楊貴妃帝欲官白妃輒阻止白自知不為親近所容益驚放不自脩與賀知章李適之汝陽王璣崔宗之蘇晉張旭焦遂為酒中八仙人懇求還山帝賜金放還白浮遊四方嘗乘舟與崔宗

之自采石至金陵著宮錦袍坐舟中旁若無人安祿山反轉側宿松匡廬間永王璘辟為府僚佐璘起兵逃回彭澤璘敗當誅初白遊并州見郭子儀奇之子儀嘗犯法白為救免至是子儀請解官以贖有詔長流夜郎會赦還尋陽坐事下獄時宋若思將吳兵三千赴河南道尋陽釋囚辟為參謀未幾辭職李陽冰為當塗令白依之代宗立以左拾遺召而白已卒年六十餘白晚好黃老度牛渚磯至姑孰悅謝家青山欲終焉及卒葬東麓元和末宣歙觀察使范傳正祭其塚禁樵採訪後裔惟二孫女嫁為民妻進止仍有風範因泣曰先祖志在

青山頃葬東麓非本意傳正為改葬立二碑焉  
南部新書云李白山東人父為任城尉因家焉稱  
蜀人非也今任城令廳有白之祠尚存唐范傳正  
誌其墓曰白涼武昭王九世孫昭王隴西人隋末  
子孫以罪徙西域神龍時白父客自西域逃居緜  
之巴西而白生焉唐魏顥李陽冰序其文劉全白  
撰其墓碣皆曰廣漢人故論白者或曰隴西或曰  
山東或曰蜀陽冰云李翰林浪跡縱酒以自昏穢  
咏歎之際屢稱山東李白亦云以張垆讒逐遊海  
岱間子美所謂汝與山東李白好蓋白自號也  
天寶遺事云李白於便殿對明皇撰詔誥時十月

大寒筆凍莫能書字帝勅宮嬪數人侍於李白左  
右令各執牙筆呵之遂取而書其詔其受聖眷如  
此

古體詩

善哉行

來日一身攜糧負薪道長食盡苦口焦唇今日醉飽樂  
過千春仙人相存誘我遠學海凌三山陸憇五嶽乘龍  
天飛目瞻兩角授以神藥金丹滿握螭蛄蒙恩深媿短  
促思填東海強銜一木道重天地軒師廣成蟬翼九五  
以求長生下士大笑如蒼蠅聲

古風

大雅久不作吾衰竟誰陳王風委蔓草戰國多荆榛龍  
虎相啖食兵戈逮狂秦正聲何微茫哀怨起騷人揚馬  
激頽波開流蕩無垠廢興雖萬變憲章亦已淪自從建  
安來綺麗不足珍聖代復元古垂衣貴清真羣才屬休  
明乘運共躍鱗文質相炳煥衆星羅秋旻我志在刪述  
垂輝映千春希聖如有立絕筆於獲麟

蟾蜍薄太清蝕此瑤臺月圓光虧中天金魄遂淪沒蟬  
竦入紫微大明夷朝暉浮雲隔兩耀萬象昏陰霏蕭蕭  
長門宮昔是今已非桂蠹花不實天霜下嚴威沈歎終

永夕感我涕沾衣

開元十二年七月廢  
皇后王氏故有此作

秦皇掃六合虎視何雄哉揮劍決浮雲諸侯盡西來明

斷自天啓大畧駕羣才收兵鑄金人函谷正東開銘功  
會稽嶺騁望琅邪臺刑徒七十萬起土驪山隈尚採不  
死藥茫然使心哀連弩射海魚長鯨正崔嵬額鼻象五  
嶽揚波噴雲雷鬢蔽青天何由覩蓬萊徐市載秦女  
樓船幾時迴但見三泉下金棺葬寒灰

鳳飛九千仞五章備綵珍銜書且虛歸空入周與秦橫  
絕歷四海所居未得鄰吾營紫河車千載落風塵藥物  
祕海嶽採鉛青溪濱時登大樓山舉首望仙真羽駕滅  
去影飈車絕迴輪尚恐丹液遲志願不及申徒霜鏡中  
髮羞彼鶴上人桃李何處開此花非我春唯應清都境  
長與韓衆親

太白何蒼蒼星辰上森列去天三百里邈爾與世絕中  
有綠髮翁披雲卧松雪不笑亦不語冥棲在巖穴我來  
逢真人長跪問寶訣粲然忽自哂授以鍊藥說銘骨傳  
其語竦身已電滅仰望不可及蒼然五情熱吾將營丹  
砂永與世人別

代馬不思越越禽不戀燕情性有所習土風固其然昔  
別雁門關今戍龍庭前驚沙亂海日飛雪迷遙天蟻蝨  
生虎鶻心魂逐旌旃苦戰功不賞忠誠難可宣誰憐李  
飛將白首沒三邊

客有鶴上仙飛飛凌太清揚言碧雲裏自道安期名兩  
兩白玉童雙吹紫鸞笙去影忽不見迴風送天聲舉首

遠望之飄然若流星願餐金光草壽與天齊傾

咸陽二三月宮柳黃金枝綠幘誰家子賣珠輕薄兒日  
莫醉酒歸白馬驕且馳意氣人所仰冶遊方及時子雲  
不曉事晚獻長楊辭賦達身已老草元鬢若絲投閣良  
可歎但為此輩嗤

莊周夢蝴蝶蝴蝶為莊周一體更變易萬事良悠悠乃  
知蓬萊水復作清淺流青門種瓜人舊日東陵侯富貴  
固如此營營何所求

齊有倜儻生魯連特高妙明月出海底一朝開光耀却  
秦振英聲後世仰末照意輕千金贈顧向平原笑吾亦  
澹蕩人拂衣可同調

金屋言金集卷二  
五  
黃河走東溟白日落西海逝川與流光飄忽不相待春  
容捨我去秋髮已衰改人生非寒松年貌豈長在吾當  
乘雲螭吸景駐光彩

松栢本孤直難為桃李顏昭昭嚴子陵垂釣滄波間身  
將客星隱心與浮雲閑長揖萬乘君還歸富春山清風  
灑六合邈然不可攀使我長歎息冥棲巖石間

君平既棄世世亦棄君平觀變窮太易探元化羣生寂  
寞綴道論空簾閉幽情騶虞不虛來鸞鷲有時鳴安知  
天漢上白日懸高名海客去已久誰人測沈冥

邊關饒風沙蕭索竟終古木落秋草黃登高望塞虜荒  
城空大漠邊色無遺堵白骨橫千霜嵯峨蔽榛莽借問

誰陵虐天驕毒威武赫怒我聖皇勞師事鞞鼓陽和變  
殺氣發卒騷中土三十六萬人哀哀淚如雨且悲就行  
役安得營農圃不見征戍兒豈知關山苦李牧今不在  
邊人飼豺虎

燕昭延郭隗遂築黃金臺劇辛方趙至鄒衍復齊來奈  
何青雲士棄我如塵埃珠玉買歌笑糟糠養賢才方知  
黃鶴舉千里獨徘徊

寶劍雙蛟龍雪花照芙蓉精光射天地雷騰不可衝一  
去別金匣飛沈失相從風胡去已久所以潛其鋒吳水  
深萬丈楚山邈千重雌雄終不隔神物會當逢

天津三月時千門桃與李朝為斷腸花莫逐東流水前

水復後水古今相續流  
新人非舊人年年橋上遊  
雞鳴海色動謁帝羅公侯  
月落西上陽餘輝半城樓  
衣冠照雲日朝下散皇州  
鞍馬如飛龍黃金絡馬頭  
行人皆辟易志氣橫嵩丘  
入門上高堂列鼎錯珍羞  
香風引趙舞清管隨齊謳  
七十紫駕鴛雙雙戲庭幽  
行樂爭晝夜自言度千秋  
功成身不退自古多愆尤  
黃犬空嘆息綠珠成釁  
讎何如鴟夷子散髮棹扁舟

泣與親友別欲語再三咽  
勗君青松心努力保霜雪  
世路多險艱白日欺紅顏  
分手各千里去去何時還

在世復幾時倏如飄風度  
空聞紫金經白首愁相誤  
撫已忽自笑沈吟為誰故  
名利徒煎熬安得閑余步  
終留

赤玉烏東上蓬山路  
秦帝如我求蒼蒼但煙霧

郢客吟白雪遺響飛青天  
徒勞歌此曲舉世誰為傳  
試為巴人唱和者乃數千  
吞聲何足道歎息空悽然

秦水別隴首幽咽多悲聲  
胡馬顧朔雪蹊蹠長嘶鳴  
感物動我心緬然含歸情  
昔視秋蛾飛今見春蠶生  
嫋嫋桑柘葉萋萋柳垂榮  
急節謝流水羈心搖懸旌  
揮涕且復去惻愴何時平

秋露如白玉團團下庭綠  
我行忽見之寒早悲歲促  
人生鳥過目胡乃自結束  
景公一何愚牛山淚相續  
物苦不知足得隴又望蜀  
人心若波瀾世路有屈曲  
三萬六千日夜當秉燭

世道日交喪，澆風散淳源。不采芳桂枝，反棲惡木根。所以桃李樹，吐花竟不言。大運有興沒，羣動爭飛奔。歸來廣成子，去入無窮門。

碧荷生幽泉，朝日艷且鮮。秋花冒綠水，密葉羅青煙。秀色空絕世，馨香誰為傳。坐看飛霜滿，凋此紅芳年。結根未得所，願託華池邊。

燕趙有秀色，綺樓青雲端。眉目艷皎月，一笑傾城歡。常恐碧草晚，坐泣秋風寒。纖手怨玉琴，清晨起長歎。焉得偶君子，共乘雙飛鸞。

容顏若飛電，時景如飄風。草綠霜已白，日西月復東。華鬢不耐秋，颯然成衰蓬。古來賢聖人，一一誰成功。君子

變猿鶴，小人為沙蟲。不及廣成子，乘雲駕輕鴻。

三季分戰國，七雄成亂麻。王風何怨怒，世道終紛拏。至人洞元象，高舉凌紫霞。仲尼欲浮海，吾祖之流沙。聖賢共淪沒，臨岐胡咄嗟。

元風變太古，道喪無時還。擾擾季葉人，雞鳴趨四關。但識金馬門，誰知蓬萊山。白首死羅綺，笑歌無時閑。綠酒哂丹液，青娥凋素顏。大儒揮金槌，琢之詩禮間。蒼蒼三珠樹，冥目焉能攀。

羽檄如流星，虎符合專城。喧呼救邊急，羣鳥皆夜鳴。白日曜紫微，三公運權衡。天地皆得一，澹然四海清。借問何以為，荅言楚徵兵。渡瀘及五月，將赴雲南征。怯卒非



戰士炎方難遠行長號別嚴親日月慘光晶泣盡繼以  
血心摧兩無聲困獸當猛虎窮魚餌奔鯨千去不一迴  
投軀豈全生如何舞干戚一使有苗平

天寶九載南詔陷雲南  
楊國忠使鮮于仲通將

兵計之大敗士卒死者  
六萬人白詩為此而作

燕臣昔慟哭五月飛秋霜庶女號蒼天震風擊齊堂精  
誠有所感造化為悲傷而我竟何辜遠身金殿傍浮雲  
蔽紫闥白日難迴光羣沙穢明珠衆草凌孤芳古來共  
歎息流淚空沾裳

孤蘭生幽園衆草共蕪沒雖照陽春暉復悲高秋月飛  
霜早淅瀝綠艷恐休歇若無清風吹香氣為誰發  
登高望四海天地何漫漫霜被羣物秋風飄大荒寒榮

華東流水萬事皆波瀾白日掩徂暉浮雲無定端梧桐  
巢燕雀枳棘棲鷓鴣且復歸去來劒歌行路難

鳳饑不啄粟所食唯琅玕焉能與羣雞感促爭一餐朝  
鳴崑丘樹夕飲砥柱湍歸飛海路遠獨宿天霜寒幸遇  
王子晉結交青雲端懷恩未得報感別空長嘆

朝弄紫泥海夕披丹霞裳揮手折若木拂此西日光雲  
卧遊八極玉顏已千霜飄飄入無倪稽首祈上皇呼我  
遊太素玉杯賜瓊漿一餐歷萬歲何用還故鄉永隨長  
風去天外恣飄揚

桃花開東園含笑誇白日偶蒙春風榮生此艷陽質豈  
無佳人色但恐花不實宛轉龍火飛零落早相失詎知

南山松獨立自蕭颯

美人出南國灼灼芙蓉姿皓齒終不發芳心空自持由  
來紫宮女共妬青蛾眉歸去瀟湘沚沈吟何足悲  
青春流驚湍朱明驟迴薄不忍看秋蓬飄揚竟何託光  
風滅蘭蕙白露灑葵藿美人不我期草木日零落

倚劔登高臺悠悠送春日蒼榛蔽層丘瓊草隱深谷鳳  
凰鳴西海欲集無珍木鸞斯得所居蒿下盈萬族晉風  
日已頽窮途方慟哭

越客採明珠提攜出南隅清輝照海月美價傾鴻都獻  
君君按劔懷寶空長吁魚目復相哂寸心增煩紆  
惻惻泣路岐哀悲素絲路岐有南北素絲易變移萬

事固如此人生無定期田實相傾奪賓客互盈虧世途  
多翻覆交道方嶮熾斗酒強然諾寸心終自疑張陳竟  
火滅蕭朱亦星離衆鳥集榮柯窮魚守枯池嗟嗟失權  
客勤問何所規

擬古

青天何歷歷明星如白石黃姑與織女相去不盈尺銀  
河無鵲橋非時將安適閨人理紈素遊子悲行役瓶冰  
知冬寒霜露欺遠客客似秋葉飛飄颻不言歸別後羅  
帶長愁寬去時衣乘月託宵夢因之寄金徽

高樓入青天下有白玉堂明月看欲隨當窗懸清光遙  
夜一美人羅衣沾秋霜含情弄柔瑟彈作陌上桑絃聲

何激烈風卷遶飛梁行人皆躑躅棲鳥去迴翔但寫妾  
意苦莫辭此曲傷願逢同心者飛作紫鴛鴦

長繩難繫日自古共悲辛黃金高北斗不惜買陽春石  
火無留光還如世中人即事已如夢後來我誰身提壺  
莫辭貧取酒會四鄰仙人殊恍惚未若醉中真

清都綠玉樹灼爍瑤臺春攀花弄秀色遠贈天仙人香  
風送紫葢直到扶桑津取掇世上艷所貴心之珍相思  
傳一笑聊欲示情親

今日風日好明日恐不如春風笑於人何乃愁自居吹  
簫舞彩鳳酌醴餽神魚千金買一醉取樂不求餘達士  
遺天地東門有二疏愚夫同瓦石有才知卷舒無事坐

悲苦塊然涸轍鮒

運速天地閉朔風結飛霜百草死冬月六龍頽西荒太  
白出東方彗星揚精光鴛鴦非越鳥何為眷南翔惟昔  
鷹將犬今為侯與王得水成蛟龍爭池奪鳳凰北斗不  
酌酒南箕空簸揚

世路今太行迴車竟何託萬族皆凋枯遂無少可樂曠  
野多白骨幽魂共銷鑠榮貴當及時春華宜照灼人非  
崑山玉安得長璫錯身沒豈不朽榮名在麟閣

月色不可掃客愁不可道玉露生秋衣流螢飛百草日  
月終銷毀天地同枯槁蟪蛄啼青松安見此樹老金丹  
寧誤俗昧者難精討爾非千歲翁多恨去世早飲酒入

玉壺藏身以為寶

生者為過客死者為歸人天地一逆旅同悲萬古塵月  
兔空擣藥扶桑已成薪白骨寂無言青松豈知春前後  
更嘆息浮榮何足珍

仙人騎綵鳳昨下閨風岑海水三清淺桃源一見尋遺  
我綠玉杯兼之紫瓊琴杯以傾美酒琴以閑素心二物  
非世有何論珠與金琴彈松裏風杯勸天上月風月長  
相知世人何倏忽

涉江弄秋水愛此荷花鮮攀荷弄其珠蕩漾不成圓佳  
期綵雲重欲贈隔遠天相思無由見悵望涼風前  
去去復去去辭君還憶君漢水既殊流楚山亦此分人

生難稱意豈得長為羣越燕喜海日燕鴻思朔雲別久  
容華晚琅玕不能飯日落知天昏夢長覺道遠望夫登  
高山化石竟不返

關山月

明月出天山蒼茫雲海間長風幾萬里吹度玉門關漢  
下白登道胡窺青海灣由來征戰地不見有人還戍客  
望邊邑思歸多苦顏高樓當此夜歎息未應閒

俠客行

趙客縵胡纓吳鉤霜雪明銀鞍照白馬颯沓如流星十  
步殺一人千里不留行事了拂衣去深藏身與名閑過  
信陵飲脫劍膝前橫將炙啖朱亥持觴勸侯嬴三杯吐

然諾五嶽倒為輕眼花耳熱後意氣素霓生救趙揮金  
槌邯鄲先震驚千秋二壯士烜赫大梁城縱死俠骨香  
不慙世上英誰能書閣下白首太元經

長干行

妾髮初覆額折花門前劇郎騎竹馬來遶牀弄青梅同  
居長千里兩小無嫌猜十四為君婦羞顏未嘗開低頭  
向暗壁千喚不一迴十五始展眉願同塵與灰常存抱  
柱信豈上望夫臺十六君遠行瞿塘滙瀨堆五月不可  
觸猿聲天外哀門前遲行跡一一生綠苔苔深不能掃  
落葉秋風早八月蝴蝶來雙飛西園草感此傷妾心坐  
愁紅顏老早晚下三巴預將書報家相迎不道遠直至

長風沙

憶妾深閨裏煙塵不曾識嫁與長干人沙頭候風色五  
月南風興思君下巴陵八月西風起想君發揚子去來  
悲如何見少離別多湘潭幾日到妾夢越風波昨夜狂  
風度吹折江頭樹淼淼暗無邊行人在何處好乘浮雲  
驄佳期蘭渚東鴛鴦綠蒲上翡翠錦屏中自憐十五餘  
顏色桃花紅那作商人婦愁水復愁風

古朗月行

小時不識月呼作白玉盤又疑瑤臺鏡飛上青雲端仙  
人垂兩足桂樹作團團白兔擣藥成問言誰與餐蟾蜍  
蝕圓影大明夜已殘昇昔落九烏天人清且安陰精此

淪惑去去不足觀憂來其如何悽愴摧心肝

獨不見

白馬誰家子黃龍邊塞兒天山三丈雪豈是遠行時春  
蕙忽秋草莎雞鳴西池風摧寒樓響月入霜閨悲憶與  
君別年種桃齊蛾眉桃今百餘尺花落成枯枝終然獨  
不見流淚空自知

妾薄命

漢帝寵阿嬌貯之黃金屋咳唾落九天隨風生珠玉寵  
極愛還歇妬深情却疎長門一步地不肖暫迴車雨落  
不上天水覆難再收君情與妾意各自東西流昔日芙  
蓉花今成斷根草以色事他人能得幾時好

黃葛篇

黃葛生洛溪黃花自綿羃青煙蔓長條繚繞幾百尺閨  
人費素手採緝作絺綌縫為絕國衣遠寄日南客蒼梧  
大火落暑服莫輕擲此物雖過時是妾手中跡

白馬篇

龍馬花雪毛金鞍五陵豪秋霜切玉劍落日明珠袍鬪  
雞事萬乘軒蓋一何高弓摧南山虎手接太行猱酒後  
競風采三杯弄寶刀殺人如剪草劇孟同遊遨發憤去  
函谷從軍向臨洮叱咤萬戰場匈奴盡奔逃歸來使酒  
氣未甯拜蕭曹羞入原憲室荒徑隱蓬蒿

大堤曲

漢水橫襄陽花開大堤暖佳期大隄下淚向南雲滿春  
風復無情吹我夢魂散不見眼中人天長音信斷

東武吟

好古笑流俗素聞賢達風方希佐明主長揖辭成功白  
日在高天迴光燭微躬恭承鳳凰詔歛起雲蘿中清切  
紫霄迴優游丹禁通君王賜顏色聲價凌煙虹乘輿擁  
翠蓋扈從金城東寶馬麗絕景錦衣入新豐依巖望松  
雪對酒鳴絲桐因學揚子雲獻賦甘泉宮天書美片善  
清芬播無窮一朝去金馬飄落成飛蓬賓客日疎散玉  
樽亦已空才力猶可倚不慙世上雄間作東武吟曲盡  
情未終書此謝知己吾尋黃綺翁

邯鄲才人嫁為廝養卒婦

妾本叢臺女揚蛾入丹闕自倚顏如花寧知有凋歇一  
辭玉階下去若朝雲沒每憶邯鄲城深宮夢秋月君王  
不可見惆悵至明發

短歌行

白日何短短百年苦易滿蒼穹浩茫茫萬劫太極長麻  
姑垂兩鬢一半已成霜天公見玉女大笑億千場吾欲  
攬六龍迴車掛扶桑北斗酌美酒勸龍各一觴富貴非  
所願與人駐顏光

相逢行

朝騎五花馬謁帝出銀臺秀色誰家子雲車珠箔開金

鞭遙指點玉勒近遲回夾轂相借問疑從天上來蹙入  
青綺門當歌共銜杯銜杯映歌扇似月雲中見相見不  
得親不如不相見相見情已深未語可知心胡為守空  
閨孤眠愁錦衾錦衾與羅幃纏綿會有時春風正澹蕩  
暮雨來何遲願因三青鳥更報長相思光景不待人須  
臾髮成絲當年失行樂老去徒傷悲持此道密意毋令  
曠佳期

沐浴子

沐芳莫彈冠浴蘭莫振衣處世忌太潔至人貴藏輝滄  
浪有釣叟吾與爾同歸

春思

燕草如碧絲秦桑低綠枝當君懷歸日是妾斷腸時春  
風不相識何事入羅幃

子夜吳歌

秦地羅敷女採桑綠水邊素手青條上紅妝白日鮮蠶  
饑妾欲去五馬莫留連

鏡湖三百里菡萏發荷花五月西施採人看隘若耶回  
舟不待月歸去越王家

長安一片月萬戶擣衣聲秋風吹不盡總是玉關情何  
日平戎虜良人罷遠征

明朝驛使發一夜絮征袍素手抽針冷那堪把剪刀裁  
縫寄遠道幾日到臨洮



對酒行

松子棲金華安期入蓬海此人古之仙羽化竟何在浮  
生速流電倏忽變光彩天地無彫換容顏有遷改對酒  
不肖飲含情欲誰待

秋浦歌

秋浦長似秋蕭條使人愁客愁不可度行上東大樓正  
西望長安下見江水流寄言向江水汝意憶儂不遙傳  
一掬淚為我達揚州  
千千石楠樹萬萬女貞林山山白鷺滿澗澗白猿吟君  
莫向秋浦猿聲碎客心

清溪行

清溪清我心水色異諸水借問新安江見底何如此人  
行明鏡中鳥度屏風裏向晚猩猩啼空悲遠遊子

秋日鍊藥院鑷白髮贈元六兄林宗

木落識歲秋瓶冰知天寒桂枝日已綠拂雪凌雲端弱  
齡接光景矯翼攀鴻鸞投分三十載榮枯同所歡長吁  
望青雲鑷白坐相看秋顏入曉鏡壯髮凋危冠窮與鮑  
生賈饑從漂母食時來極天人道在豈吟嘆樂毅方適  
趙蘇秦初說韓卷舒固在我何事空摧殘

書情贈蔡舍人雄

嘗高謝太傅攜妓東山門楚舞醉碧雲吳歌斷清猿暫  
因蒼生起談笑安黎元余亦愛此人丹霄冀飛翻遭逢

聖明主敢進興亡言白璧竟何辜青蠅遂成冤一朝去  
京國十載客梁園猛犬吠九關殺人憤精魂皇穹雪冤  
枉白日開昏氛太階得夔龍桃李滿中原倒海索明月  
凌山採芳蓀愧無橫草功虛負雨露恩跡謝雲臺閣心  
隨天馬轅夫子王佐才而今復誰論層飈振六翮不日  
思騰騫我縱五湖棹煙濤恣崩奔夢釣子陵湍英風緬  
猶存彼希客星隱弱植不足援千里一回首萬里一長  
歌黃鶴不復來清風愁奈何舟浮瀟湘月山倒洞庭波  
投汨笑古人臨濠得天和閑時田畝中搔背牧雞鵝別  
離解相訪應在武陵多

叙舊贈江陽宰陸調

太伯讓天下仲雍揚波濤清風蕩萬古跡與星辰高開  
吳食東溟陸氏世英髦多君秉古節嶽立冠人曹風流  
少年時京洛事遊遨晉間延陵劍玉帶明珠袍我昔鬪  
雞徒連延五陵豪邀遮相組織呵嚇來煎熬君開萬人  
叢鞍馬皆辟易告急清憲臺脫余北門厄間宰江陽邑  
剪棘樹蘭芳城門何肅穆五月輝秋霜好鳥集珍木高  
才列華堂侍從府中歸絲管儼成行但苦隔遠道無由  
共銜觴江北荷花開江南楊梅熟正好飲酒時懷賢在  
心目掛席拾海月乘風下長川多沽新豐醪滿載剡溪  
船中途不遇人直到爾門前大笑同一醉取樂平生年

贈武十七諤

并序

門人武諤深於義者也質木沈悍慕要離之風  
潛釣川海不數數於世間事聞中原作難西來  
訪余余愛子伯禽在魯許將冒兵烽以致之酒  
酣感激援筆而贈

馬如一匹練明日過吳門乃是要離客西來欲報恩笑  
開燕匕首拂拭竟無言狄犬吠清洛天津成塞垣愛子  
隔東魯空悲斷腸猿林回棄白壁千里阻同奔君為我  
致之輕齎涉淮源精誠合天道不愧遠遊魂

經亂離後天恩流夜郎憶舊遊書懷贈江夏韋太

守良宰

天上白玉京十二樓五城仙人撫我頂結髮受長生誤

逐世間樂頗窮理亂情九十六聖君浮雲掛空名天地  
賭一擲未能忘戰爭試涉霸王畧將期軒冕榮時命乃  
大謬棄之海上行學劍翻自哂為文竟何成劍非萬人  
敵文竊四海聲兒戲不足道五噫出西京臨當欲去時  
慷慨淚沾纓嘆君個儻才標舉冠羣英開筵引祖帳慰  
此遠徂征鞍馬若浮雲送余驃騎亭歌鐘不盡意白日  
落昆明十月到幽州戈鋌若羅星君王棄北海掃地借  
長鯨呼吸走百川燕然可摧傾心知不得語却欲棲蓬  
瀛彎弧懼天狼挾矢不敢張攬涕黃金臺呼天哭昭王  
無人貴駿骨騾耳空騰驤樂毅儻再生於今亦奔亡蹉  
跎不得意驅馬還貴鄉逢君聽絃歌肅穆坐華堂百里

獨太古陶然卧羲皇徵樂昌樂館開筵列壺觴賢豪間  
青娥對燭儼成行醉舞紛綺席清歌遶飛梁歡娛未終  
朝秩滿歸咸陽祖道擁萬人供帳遙相望一別隔千里  
榮枯異炎涼炎涼幾度改九土中橫潰漢甲連燕兵沙  
塵暗雲海草木搖殺氣星辰無光彩白骨成丘山蒼生  
竟何罪幽關壯帝居國命懸哥舒長戟三十萬開門納  
兇渠公卿如犬羊忠讜醢與菹二聖出遊豫兩京遂丘  
墟帝子許專征秉旄控強楚節制非桓文軍師擁熊虎  
人心失去就賊勢騰風雨惟君固房陵誠節冠終古僕  
卧香爐頂食霞漱瑶泉門開九江轉枕下五湖連半夜  
水軍來尋陽滿旌旃空名適自誤迫脅上樓船徒賜五

百金棄之若浮煙辭官不受賞翻謫夜郎天夜郎萬里  
道西上令人老掃蕩六合清仍爲負霜草日月無偏照  
何由訴蒼昊良牧稱神明深仁恤交道一忝青雲客三  
登黃鶴樓顧慙禰處士虛對鸚鵡洲樊山霸氣盡寥落  
天地秋江帶峨眉雪川橫三峽流萬舸此中來連帆過  
揚州送此萬里目曠然散我愁紗窗倚天開水樹綠如  
髮窺日畏銜山促酒喜見月吳娃與越艷窈窕誇鉛紅  
呼來上雲梯含笑出簾櫳對客小垂手羅衣舞春風賓  
跪請休息主人情未極覽君荆山作江鮑堪動色秋水  
出芙蓉天然去雕飾逸興橫素襟無時不招尋朱門擁  
虎士列戟何森森剪鑿竹石開縈流漲清深登臺坐水

閣吐論多英音片辭貴白璧一諾輕黃金謂我不愧君  
青鳥明丹心五色雲間鵲飛鳴天上來傳聞赦書至却  
放夜郎迴暖氣變寒谷炎煙生死灰君登鳳池去忽棄  
賈生才桀犬尚吠堯匈奴笑千秋中夜四五嘆常為大  
國憂旌旆夾兩山黃河當中流連雞不得進飲馬空夷  
猶安得羿善射一箭落旄頭

贈盧司戶

秋色無遠近出門盡寒山白雲遙相識待我蒼梧間借  
問盧耽鶴西飛幾歲還

贈別舍人弟臺卿之江南

去國客行遠還山秋夢長梧桐落金井一葉飛銀牀覺

罷攬明鏡鬢毛颯已霜良圖委蔓草古貌成枯桑欲道  
心下事時人疑夜光因為洞庭葉飄落之瀟湘令弟經  
濟士謫居我何傷潛蚪隱尺水著論談興亡客遇王子  
喬口傳不死方入洞過天地登真朝玉皇吾將撫爾背  
揮手遂翱翔

贈宣城宇文太守兼呈崔侍御

白若白鷺鮮清如清唳蟬受氣有本性不為外物遷飲  
水箕山上食雪首陽巔迴車避朝歌掩口去盜泉岩堯  
廣成子個儻魯仲連卓絕二公外丹心無間然昔攀六  
龍飛今作百鍊鉛懷恩欲報主投佩向北燕彎弓綠弦  
開滿月不憚堅間騎駿馬獵一射兩虎穿回旋若流光

轉背落雙鳶胡虜三嘆息兼知五兵權鎗鎗突雲將却  
掩我之妍多逢勦絕兒生著祖生鞭據鞍空矍鑠壯志  
竟誰宣蹉跎復來歸憂恨坐相煎無風難破浪失計長  
江邊危苦惜頽光金波忽三圓時遊敬亭上間聽松風  
眠或弄宛溪月虛舟信洄沿顏公二十萬盡付酒家錢  
興發每取之聊向醉中仙過此無一事靜談秋水篇君  
從九卿來水國有豐年魚鹽滿市井布帛如雲煙下馬  
不作威水壺照清川霜眉邑中叟皆美太守賢時時慰  
風俗往往出東田竹馬數小兒拜迎白鹿前含笑問使  
君日晚可迴旋遂歸池上酌掩抑清風絃曾標橫浮雲  
下撫謝朓肩樓高碧海出樹古青蘿懸光祿紫霞杯伊

昔忝相傳良圖掃沙漠別夢繞旌旃富貴日成疎願言  
杳無緣登龍有直道倚玉阻芳筵敢獻繞朝策思同郭  
泰船何言一水淺似隔九重天崔生何傲岸縱酒復談  
元身為名公子英才苦迍邅鳴鳳托高梧凌風何翩翩  
安知慕羣客彈劔拂秋蓮

自梁園至敬亭山見會公談陵陽山水兼期同遊  
因有此贈

我隨秋風來瑤草恐衰歇中途寡名山安得弄雲月渡  
江如昨日黃葉向人飛敬亭愜素尚弭棹流清輝水谷  
明且秀陵巒抱江城粲粲吳與史衣冠耀天京水國饒  
英奇潛光卧幽草會公真名僧所在即為寶開堂振白

拂高論橫青雲雪山掃粉壁墨客多新文為余話幽棲  
且述陵陽美天開白龍潭月映清秋水黃山望石柱突  
兀誰開張黃鶴久不來子安在蒼茫東南焉可窮山鳥  
飛絕處稠疊千萬峯相連入雲去聞此期振策歸來空  
閉關相思如明月可望不可攀何當移白足早晚凌蒼  
山且寄一書札令予解愁顏

贈閻丘處士

賢人有素業乃在沙塘陂竹影掃秋月荷花落古池閒  
讀山海經散帙卧遙帷且耽田家樂遂曠林中期野酌  
勸芳酒園蔬烹露葵如能樹桃李為我結茅茨

經亂後將避地剡中留贈崔宣城

雙鸞飛洛陽五馬渡江徼何意上東門胡雛更長嘯中  
原走豺虎烈火及宗廟太白晝經天頽陽掩餘照名城  
皆蕩覆世路成奔峭四海望長安嘖眷寡西笑蒼生疑  
落葉白骨空相吊連兵似雪山破敵誰能料我垂北溟  
翼且學南山豹崔子賢主人歡娛每相召胡床紫玉笛  
却坐青雲叫楊花滿州城置酒同臨眺忽思剡溪去水  
石遠清妙雪晝天地明風開湖山貌悶為洛生詠醉發  
吳越調赤霞動金光日足森海嶠獨散萬古意閒垂一  
溪釣猿近天上啼人移月邊棹無以墨綬苦來求丹砂  
要華髮長折腰將貽陶公誚

安陸白兆山桃花岳寄劉侍御綰

雲卧三十年好閒復愛仙蓬壺雖冥絕鸞鶴心悠然歸  
來桃花岳得憇雲窗眠對嶺人共語飲潭猿相連時昇  
翠微上邈若羅浮巔兩岑抱東壑一嶂橫西天樹雜日  
易隱崖傾月難圓芳草換野色飛蘿搖春煙入遠構石  
室選幽開山田獨此林下意杳無區中緣永辭霜臺客  
千載方來旋

望終南山寄紫閣隱者

出門見南山引領意無限秀色難為名蒼翠日在眼有  
時白雲起天際自舒卷心中與之然託興每不淺何當  
造幽人滅跡棲絕巘

夕霽杜陵登樓寄韋繇

浮陽滅霽景萬物生秋容登樓送遠目伏檻觀羣峯原  
野曠超緬關河紛雜重清輝映竹日翠色明雲松蹈海  
寄遐想還山迷舊蹤徒然迫晚暮未果諧心曾結桂空  
佇立折麻恨莫從思君達永夜長樂聞疎鐘

秋夜宿龍門香山寺奉寄王方城十七丈奉國營

上人從弟幼成令問

朝發汝海東莫棲龍門中水寒夕波急木落秋山空望  
極九霄迴賞幽萬壑通目皓沙上月心清松下風玉斗  
橫網戶銀河耿花宮興在趣方逸歡餘情未終鳳駕憶  
王子虎溪懷遠公桂枝坐銷歇棣華不復同流恨寄伊  
水盈盈焉可窮







